



遜志齋集卷之二十三

中順大夫浙江按察司副使奉勅提督學校雲間范惟一編輯

奉政大夫浙江按察司僉事奉勅整飭兵備南昌唐堯臣校訂

中順大夫浙江台州府知府事刑部郎中東吳王可大校刊

古詩

蜀府敬慎齋

天降大命孔神而明巍巍天位匪德莫承赫赫聖皇
天實予之奄宅九有不冒四夷百辟是臨兆民是使
何遠弗綏何悍弗靡德威所加孰不震驚尚篤祗慎
以奉天明矧惟哲王有此大國天子之祐之寵之錫

君于西土厥壤汪汪喬岷大江式固其疆有臣有民
有隣有輔外有戎羗于徼于圉匪格以誠孰克潛孚
匪治以仁疲羸曷蘇教之禦之以恩以禮攘之訓之
威武豈弟天有顯任舉集玉躬惟克敬慎廼寧家邦
惟聖天子肇基百世衆建藩輔以匡來裔厥或罔恭
民亦罔從厥或弗慎下孰敢信惟王迪德懋昭大猷
日宣聖學以祇天休悃悃于思瓊瓊于守穆穆語言
不驚左右視乎在服有秩有倫視乎在廷紀法具陳
視乎禁衛動有矩律視乎郊圻靡有意逸云孰致之
敬慎使然惟克敬慎廼罔有愆惟爾今王天子攸倚

四國攸喜下民攸恃王于齋宮吉士祁祁教言徐徐
溫其有儀蹀躞黃髮忠嘉啓告直辭靡撓不怒以笑
古昔格王未有烈光彼或慢肆福祿靡常王孰稽古
天下取則宜其邦國稽古惟王邦國以康胤嗣用昌
天佑大明藩輔多賢宜于民人於千萬年

大文讀書齋

翼翼高齋秩秩群經推辭繹義必敬必誠持心惟虛
是受是承立志惟篤是毅是弘恢廓其量可吞滄溟
奮作其勇若捍都城求之勿易思之勿更取之欲博
約之欲精聖言何疑不疑不明聖道何正不正不平

融會其殊操植其恒朝斯夕斯期乎有成外怯不足
小德微能內有若無盎溢缶盈惟仁之居惟義之貞
霽月之明止水之澄天君明泰我縱我橫道無不得
理無不形富貴敝屣子女酷刑難玷污辱寧過潔清
大之天下小之家庭是經是緯是章是程聖讀庸行
馬牛冠纓博覽孔殷書匱是銘允矣君子夜寐夙興
惟誠惟勇有權有衡聖訓赫臨于几于楹聖經是讀
聖德是行

四月一日蒙賜宴浣花新建草堂感恩懷古偶
作

靈雨過瑤階朝陽麗金殿吾王講藝餘特賜群儒宴
茲惟杜子宅遺址當郊甸盛代仰前脩高堂歛重建
葺茅昭舊迹拓地增新觀棟宇極崇華簷薨儼雕煥
兩楹陳綺席僊醴兼珍膳列坐無俗賓銜恩共酬勸
花溪浮砌淨雪嶺當窻見覽物獨興懷古人如對面
追思天寶後宇內疲征戰徒抱稷契心莫覩唐虞禪
薄游經險阻放意娛篇翰使獲遭聖明寧令老貧賤
人生鮮遇合自昔共嗟惋並世或棄捐千秋有相羨
吾曹獨何幸淺技蒙深眷難報國士知空爲昔賢歎
江山鍾粹美天地存幽贊佇俟英俊興重看盛文獻

臣近述基命錄粗載三代帝王寬厚之政以寓
忠愛之私幸徹睿覽過蒙賜詩寵褒詞高旨遠
復增慚荷謹依韻畧陳情以謝萬一云
明哲昔御世虚心禮賢臣令名昭簡策千秋播清芬
賢王啓大藩懿德貞且純英姿邁前烈高志企古人
聖學自得師曠代莫與鄰睿謨粲可述善政難具陳
况復抱雄才著作妙入神下筆百川湧潤澤義與仁
陋儒亦何幸趨召奉絲綸恩言寵賜褒猥謂堪致君
仰惟文獻國濟濟申白賓圖治超太古餘光能見分
謹歌擬雅頌烜赫繼丘墳

齋殿觀書恭侍間燕且承賜文嘉勞無任感服
謹賦詩一首以抒下情

無爲運王化虛靜契天心神情既昭朗外誘安能侵
齋居閱道妙端拱肅冠襟超然萬彙表儼若上帝臨
竹素粲盈前群言恣窺尋遐思自知要博采仍鈎深
嗜古忘飢渴好善踰球琳冥觀會衆理抗志珍分陰
俯仰周乾坤瞬息貫古今人爵已莫並天貴誰能任
賑窶散倉粟贖人捐府金政教洽四境蒼生歌德音
文昭聖明喜誠恪鬼神歆陋儒荷寵光避席瞻旒簪
垂歡惠顏色灑翰嘉忠忱瀚海茫無涯豈復資蹄涔

譬彼一簣土寧補泰華岑受恩徒徬徨憂懷鬱欽欽
鴻勳希日奭令名仰回參日新崇大業濟世同舟霖
臣仰德之深非言可喻謹次淵明九日詩韻叙

謝萬一

至人憲天德虚心體群生自爲代工計豈爲濟衆名
惟王間世才欽聖奉天明端居澹無欲四海流仁聲
耄倪競稽首願王壽千齡如彼岷峨高不騫復不傾
小臣最陋劣夙受顧盼榮孤恩愧明義念舊勞睿情
臨風拭病目思見德化成

癸酉歲京府徵考試繼奉蜀王殿下命述事

少時輕離別言氣壯強及茲未莫年已復多感傷
念昔之蜀都言侍賢王放懷禮法地取樂文翰場
耆俊滿大廷言濟會冠裳出言有同趣講藝靡乖方
惟王帝室言以達世莫當精誠洞千古一日連十行
道大才更雄氣溫色彌莊勞心撫庶政虛已思虞唐
封內數十州德聲藹洋洋皇天降嘉貺百穀屢豐穰
盛美不自居檢身循典章凝情觀衆妙博問取所長
自慚魯鈍學三歲承寵光避席玉座側設醴金殿旁
睿哲能兼容闕失專覆藏采陟等葑菲比珍匪琳琅
近者迎屬車拜辭褒水陽情真賜色咲感激銘肺腑

喜遇大比秋齋官舍書涼寸情擬披豁古訓思對揚
雖乏涓埃補忠貞誓無忘豈知事難必曩願弗獲償
徵書京國來迅若晨風翔謬忝較文職守臣啓儲皇
儲皇新德一作聽政出令聞八荒戒飭况丁寧庸薄實
恐惶經旬廢寢食嘔欬病在床王人俄繼至幣自藩
闡將強起扶杖迎坐語兩傍徨報國固臣節效信亦
士常趨召違天朝懼非義所減王心秉忠孝處事明
且詳微衷倘見察庶或貸死亡赫赫我大明幅員同
夏商仁恩洽宇宙帝業熾以昌九有如一象內外咸
樂康取士皆為國何嘗限封疆蜀道平若砥漢水淺
可航胡為不能往矯首徒慨慷白日流光輝葵藿隨
低昂願王崇明德以慰葵藿望

休日奉陪蜀府諸公宴集

居閑嘆時邁閱世知才短頰為觀國遊每覺歸期緩
群公盡耆英過從恨殊晚他鄉親故稀骨肉不在眼
非資談味歡孰使離情展大藩仰仁哲政化崇寬簡
長日自優游茲辰况休澣牲醪出珍賜果蔬隨物產
一觴偶相酬萬慮皆可遣貴同周士肆狂笑晉人嬾
語樂天趣深心清市塵遠新秋欣已至毒暑行將斷
靈雨席上來微涼座中滿明時古難遇良會世所罕

各勉存令猷垂聲繼伊管

蜀府遇夏峇教諭次韻叙德言懷

周道昔淪喪鳳鳥收其聲紛紛徇世士各以智術鳴
仲舒起西都蜀漢有孔明下帷談正誼濡走濟群生
二子苟遇時惠澤被孤惇惜其遭逢謬不見禮樂興
邇來一千年文獻鮮有徵豈無輔相貴未免利祿嬰
鄙夫何所知浪竊當世名致君事莫及好古心徒傾
身疲道路長興入江山清偶隨群臣後獲見百代英
神姿儼淵肅雄論極醇精德政尚寬和西土臻治平
福善固天理願治本民情昔嘆賢豪稀今見德位并

寄言同袍子拭目王化行

士盤閒居感懷十七首

鳴鳩知天雨乾鵲知天風蟋蟀最無知亦悲年運窮
云何當世上憤憤温飽中變故如波濤浮沉安所終
鳳隨天風下暮息梧桐枝群鴟得腐鼠咲汝長苦飢
舉頭望八荒默與千秋期一飽亮易得所存終不移
乘時功易立處下事少成君看蕭曹才豈若魯兩生
賢豪志大業舉措流俗驚循循刀筆間固足爲公卿
賢有四海志家無一金貲言高力不足舉世爭笑之
不如富俠子錢刀散孤嫠閭閻稱行義赫赫名聲垂

竊竊衆所憂不踰衣食間孰知温飽外可憂非一端
賤憂道難行貴憂名不完誰能斷棄此自樂如孔顏
無事本無尤無作自無愧心超萬化表跡混人群內
卑卑流俗語懶問亦懶對有時或出門獨撫霜中檜
庭前兩古檜封植今百年女蘿欺衰朽揚翹冠其巔
弱榮蒲柳脆鉅榦金石堅得時不自料歲晚良可憐
我非今世人空懷今世憂所憂諒無他慨想禹九州
商君以爲秦周公以爲周哀哉萬年後誰爲斯民謀
士無及物智每喜華其廬我居豈不敝於道已有餘
明取容吾身與取蔽吾書奚須嘆其陋不見阿房初

秦人奮戎狄蠶食舉八荒自言功德大傳叙萬世長
鮑魚臭未絕赤龍歛飛翔巍巍且莫保瑣瑣安可量
習俗日頽壞疇能塞其源自從并牧廢開此爭效門
救弊豈無術得君古難言田間一卮酒跼酌蒼梧魂
道喪學術敝士心日汗卑躋扳得斗祿寧使節行隳
古人安分義卿相有不爲栖栖糞土中困處固其宜
俗士不知道喜以異自雄安知名世者固與常人同
聖賢盡其常縱浪禮義中何須驚神變恂悅驚群聳
內有丘山重外有秋毫輕於心不自得誰免慕榮名
少賤事干謁尊貴樂驕盈焉知陋巷士塵芥視簪纓

利欲烈炎火雷燄起縱橫區區一子輿死以口舌爭
豈不念迂遠安能負平生皇皇斯浪困炳炳萬世明
胡貊咲紈綺吳越賤堅車群庸方囂囂固謂智士愚
刀筆計得失絲粟較盈虧誰云周公聖對此慚不如
池魚不知海越鳥不思燕蚯蚓霸一穴神龍輕九天
小大萬相殊豈惟物性然君子勿歎息彼誠可哀憐

次王仲縉感懷韻十首兼呈張廷璧

哲后踐貞軌簡策有餘馥彼或趨卑汗流惡寧有足
明達知所師鑑古以自燭惟王實天縱虛心湛無欲
學道期濟人爲善靡徼福群書不去手萬理瞭在目

鄙臣守鉛槧恩光蒙遠矚穆如首夏風煦若陽春旭
才微媿寵厚跡賤慚愛篤報德諒無階錫嘏徒有祝
東京多節士我懷管幼安騰身風塵表寵祿寧肯干
子魚不相諒高位屢超遷腐鼠欲見污聞之媿心顏
皜皜由夷姿迥出兩漢前彼哉阿世者變滅同飛煙
榮華神所戲貧賤節斯完此道匪難知胡爲人不然
禍生既有胎福茂詎無根玄理諒不爽群動何紘紘
商周數百載積累甚至仁胤嗣豈皆賢所藉先澤存
後王昧經遠謀慮止其身於道或隅合秉心殊未純
未懷極盛時民物熙陽春孟氏好斥霸惡彼能亂真

卷之三十一
隆中有一士卓然古天民長嘯六合間草昧思經綸
寸心如白日可破萬古昏所遇雖不諧餘輝尚燉燉
使逢高光主禮樂寧沉湮惜其遺書亡大志人罕聞
如何徇利子於道不知真卑卑章句中微祿求潤身
可貴不在位可賤不在貧無取一時好當作千載人
翠鳥質微細乃以羽自戕犀象獸之雄每因齒角亡
物生無巨小適用反相傷犬羊死柔弱虎豹死暴強
彭聃死於壽夭者死於殤萬生誰長存所貴德譽光
古來志節士立身有大方孰云蕭艾藜藿勝蘭蕙芳
封倫論治道盛詆習俗漓鄭公若砥柱坐障狂瀾馳

嗟此古遺直磊落胸中奇遭逢英明君計畫得小施
劉蕢豈不備結舌竟如癡浚恒寧獨然天運固若斯
焯焯趨愈下滔滔竟何之萬事吾不識聊以善自持
始見澤腹堅又聞谷風至炎熇復能幾木葉忽已墜
四序不少停景物日夜異思之熱中腸不遑食與寐
支離如病鶴顧影獨長唳黃雀飽稻梁呖爾垂兩翅
野性拙生理大化無停機緼袍汗沃若絺綌風淒其
壯士千載心豈憂食與衣由來浮海志不是軒冕姿
人生尚聞道富貴復奚爲賢有陋巷樂聖有西山飢
朶頤多所失苦節未可非

保身戒無疾制治憂小康苟操敬慎心何必求扁倉
依依桃李花安知有嚴霜松竹淡自守歲晚凌衆芳
小人徒媵姍志士多慨慷我生豈不貴萬物備天常
天常既無虧貧賤果何傷

榮華衆所慕志得虞咎愆賤貧可無憂復爲飢凍纏
有能外兩途逍遙循自然苟不悟斯道中心何由宣
曰予素寡昧未達性命原勵茲不息操夙夜靡遑安
奮庸有伊周處約有騫淵敬承聖哲訓庶慰遲暮年
追次朱子春懷詩韻

聞鍾理短髮徐步啓荆扉不知夜雨過園林頓芳菲
江山靜妙顏雲日浮清輝殘梅落欲盡幽池水痕肥
始見新歲來景物忽如茲徒爲逝川嘆未遂滄州期
及時貴取樂莫遣青春歸

舟中呈同召葉夷仲林公輔揚大中陳元豐

一作采

本乏適時用誤爲當世知進身媿蹇拙退處乃其宜
何意承寵光使車忽來茲靡靡踰南國秩秩錫多儀
嚴程不可稽王命自有期親愛俱在眼弗獲顧我私
聖猷同山嶽微忠劣毫絲黽勉諒何補徒興千載思
上巳約友登南樓

生意忽滿眼不知春淺深良朋曠嘉會濁酒難孤斟

迢迢城上樓高朗宜遠臨曷不一舉趾縱望淵與岑
逍遙群動表舒豁萬古心古人已寂寞繼者應在今
蘊真有至樂外慕非所欽疇昔舞雩詠千秋虞氏琴
窮達各有適宇宙流遺音景風生穆清佳趣溢魚禽
願言領衆妙無爲鬱冲襟

次韻

春色與漢水相看兩俱深誰能當此時有酒不共斟
城端聳華構賓友皆來臨東瞻太白雪西望峩峩岑
縱觀八紘內洞見天地心千年等旦暮豈識古與今
尚友懷賢豪妄意鮮所欽慷慨隆中嘯窈眇河汾琴
其人儼不忘思欲嗣徽音觴多意不盡譁咲驚飛禽
清風似相知數數吹余襟

再次前韻

昔時喜飲酒舉白不辭深及茲中歲來已復畏人斟
後生多所忽豈識老會臨志士惜景光登麓已知岑
每聞前世事頗見古人心逝者良不息將來誰嗣今
百年當有成泯滅寧足欽每憐伯牙陋鍾死破其琴
自得苟堪傳何必求知音俯觀水中儵仰觀雲際禽
真樂不吾隱欣然豁煩襟

送鄭叔貞之成都

謝公江海人雅量極宏廓中年別親友猶謂懷抱惡
况我褊迫士志意早衰弱辟如遠指金詎耐膏火爍
豈無骨肉親相望天一角兩生萬里至講道慰寂寞
探竒忘舊悲觀妙有新樂寧知事多忤重使嘆離索
林也前歲歸重來忘曩約鄭子今復去南行踰巘嶸
成都壯麗地江水帶郭郭山窺子美堂雲護孔明栢
壯遊豈不佳觀國資所學國僚盡耆俊政簡恒燕醪
日開百金筵坐有四方客擒毫歌盛美文彩紛烜赫
卓爾樂邦風巍乎王者宅王誠天人秀令德顏閔若
神機盡經緯大度蘊才畧心融群聖言穎銳智獨覺

坐收千古秘萬理隨綜錯尚友師徽猷姚姒靡間隔
勵精施惠政民物沾德澤至化通幽明餘恩及飛躍
小心事天子放意耽簡策道積不自盈怡怡躬吐握
知名久佇望前席啓東閣立談盡歡娛至理無適莫
從容倘垂問占對慎酢酢爲言寡朋儔舊業愈荒落
疑經待同勘蕪史期共削相須左右肱理勢不可各
王仁極深廣夙昔受殊渥囊餘舊賜錢篋有新頒帛
身爲微職絆感歎顏面忤使子能輸忠寧不副所托
金門盛才彥德星耀井絡翩翩白鳳群豈復少一鶴
惟茲山南郡士氣陋且薄古心莫與論積疾誰爲藥

願子早告歸離憂變歡噓四科洙泗道五等成周爵
真知苟內充外物奚須度旱麓清照人漢水淺可濯
懷哉春服成重繼咏歸作

又送叔貞之成都

空名誑當世自誤還勞人鄭子復爲誰跋涉窮冬春
去年赴上國風雪迷江津徒步從我行面黑手足皴
今茲有徵命欲往志靡伸子復之成都代余陳所因
念子遠遊學三年別慈親敝衣犯緇垢斷裂莫爲紉
蜀道幸坦平王化甚惠仁歷覽快心目庶足忘苦辛
諸葛政猶在少陵詩有神浩蕩觀大江穹秀瞻峨岷
心曾蘊竒偉撫事氣益振丈夫平生懷豈惟安其身
况可廣咨訪大邦多縉紳恨我不得俱惟恐孤主恩
見王丹三謝念此踈遠臣

偶爾遣意奉呈同學諸君子及示叔貞秀才

累物擾靈府澹然無所爲家貧自鮮營萬事俱不知
日祿餘一斗粗給菜與麩林田亦易畊有酒供四時
門多儒雅客暇則斟酌之相對靡俗言共談止詩書
遐情或深契歡咲同解頤孰謂千古遠其人如在茲
於心有至樂天地亦可遺未知軒裳貴詎識勢位卑
彼美要路仕賢勞耀輕肥窮通各有適寧論是與非

送謝生因奉寄岐陽公

帝子謹王度大藩臻治平文風播南土四國揚休聲
上公國懿親令德惟邦禎奉恩自夙昔脩貢表貞誠
名馬西域來玉勒懸珠纓金門足麒麟特受顧盼榮
王昨駐中都貂蟬藹盈庭公來必燕語禮接同友生
異質况天挺至尊愛彌甥勳賢冠當世夷夏欽盛名
繼美實在茲聞望良匪輕近因師傅重愈見德業成
曆數傳萬年蒼生仰皇明豈徒本支盛股肱在公卿
海內雖已康民俗猶未寧鄙夫抱深念思覩禮樂興
願公善匡輔報主以忠貞載光史臣籍未邁宗戚英

靈雨洗南麓漢光晚來盈臨流送回使懷古動遐情

發褒城過七盤嶺宿獨架橋閣上

名爲不祥噐斯理昔未覺及茲困奔走始嘆立論確
險哉七盤山羊腸凌巘嶢三年八往返顛頽髮早白
此行當盛夏溽暑逞餘霄晝伏避蚤蛩宵征越林薄
危橋帶褒水俯瞰波流惡鑿石勞衆工綠崖構飛閣
下扶千柱壯上倚浮雲弱怒雷地底鳴懸瀑崖際落
山中郵傳少過客咨淒泊勞者務苟安寧思其所托
更聞急雨至洪濤相噴薄鬼神助晦冥天地混磅礴
病身倦輾轉酣寢絕疑愕晨興霄景澄林壑還可樂



原件短缺

P16

有生大化中萬變相綜錯所遇聽自然何處匪安宅
歷聘魯中叟詠歸沂上客勞逸命分殊順俟安敢擇

過滌陽

露濕塵不起曉行秋氣清遙聯天星未沒野草虫亂
鳴途中何所見多見古軍營斷溝無新流水荒隴存
古城爲問戰者誰其人總豪英當時誇氣勢畢命恣
紛爭但恨智力殫詎思時世更寂寞千載後艱勞竟
何成身亡事即已得失存空名善者或稱嘆惡者受
譏評因之念首陽西顧清風生感此默自嘆白日車
前明

秋林道旁有橙樹處荆棘中不知幾何年矣
會增置驛舍芟夷堂基斧斤幾及遇識者知
其爲菓實之美也獲免築室旣成正值窻牖
間結實纍纍然可愛過而見焉感而爲之賦

詩

橙生蜀山裏蕪沒荆棘場荆棘忽剪除孤根虞見傷
幸遇識者顧扶植不忍戕築室適在茲窻牖正相當
花垂素雪盛葉茂青雲張方秋氣盛肅原野飛早霜
衆木不復榮百草已罷芳纍纍枝間實爛爛半青黃
摘置樽俎間几席有餘輝光豈惟巴人羨南服亦罕

嘗鬼峩帝王宮異味來萬方何以解煩渴甘酪間蔗
漿此物倘前陳玉食倍馨香可令積疾蠲坐見人情
康惜無先容者吁彼途路長遇世良有會處已貴安
常歲寒善自保用舍隨行藏

栽柏

迂拙乖世用每蘊無窮思取效非目前遠與千載期
翠栢信良材成長計功遲茲晨斲煙雨移動盈尺姿
清廟嚴潔地聖靈會于斯豈無杞柳輩不足當階墀
殷社夙所尚古制非徒爲先師實殷人植此理固宜
但恐枝幹弱不耐風霜欺培護苟無失終見盛大時

三年過人長十年齊桶榱百年必合抱根深柯葉滋
青霄泊鸞鳳厚土蟠蛟螭豈特傲寒暑將堪閱興衰
所托况得所永免斤斧危旣膺顧盼榮復與剪伐辭
寥寥百世後神物相扶持何必爲棟梁廼見材氣施
流光若飛翰時代易推移行看好古士追說種者誰
我生素多病中歲早孱羸待爲鶴髮翁見汝凌雲枝
志士用心者濩落爲世嗤何如群兒巧插槿紛成籬
新栽栢爲瓠蔓所纏令諸生披解以遂生意有

作

青青庭前栢秣植芳春時旣承雨露潤歛見雲霄姿

盛夏乏人工眼中蕪穢滋瓠壺引長蔓左右纏蔽之
晨興試行觀沉思喟然悲微物凌善類勝負關盛衰
巨葉覆其顛濃陰密如帷自非爲披拆恐使嘉樹萎
呼童操短鎌芟彼草與茨瓠蔓亦徐解扶持向藩籬
植物共有生榮枯兩無知貞脆本天質生成仗人爲
仰惟玄造心發育靡偏私於焉別減否可以人理推
漢昭任博陸不受群邪欺符堅逐仇騰景畧事業施
用賢必遠佞果斷貴無疑嗟余何爲者棲屑名位卑
觸物徒有懷於時竟奚裨栢也材氣良取效嘗患遲
衆人重口腹愛瓠固其宜紛紛俄頃計落落千載期

若歌向蒼穹此意知者誰

十丈喜脩德汝器二君子偕嘉猷秀才至

宛宛心所慕盈盈日興思今辰果何祥舉目皆在茲
經時抱沉瘵杜門謝親知猶獨莫與徒有懷欲從誰
聊求古人志遠與後世期放情簡冊間庶以靜自怡
此意信似拙衆方背而馳非子秉冲襟疇能無棄遺
敝廬固落日炎暑每相欺清談偶有遶四座生涼颺
久乏經世具孰正生民彝深衷鬱未宣流光迅難追
慨餘喜胥會豈以慰我私相期樹斯道與國隆丕基

孟春又盛非中夏故來爾只只同甲子

合流莫常

孟春期過我仲夏始來翔只尺同里居會合猶莫常
何況涉遠道各據天一方言歸雖有期心思詎能忘
我如失群鶴歛翮鷺鷥場時逢涼飈發仰首睇穹蒼
子若隨陽鴈高舉隘八荒知時識天叙豈慕稻與梁
哲兄富文學簪筆侍賢王愛國心事苦念親夢魂長
朝退寢室靜閱書焚妙香賓僚各雨散思子不在旁
子去義所安講道信有望山河壯都會圖譜有餘芳
吊古考隆替撫時推興亡賈傳論過秦杜生賦阿房
千秋繼竒偉亦足宣慨慷顧惟河洛間神丘鬱相當
遠思百聖烈近想群賢咸載瞻伊水濱二龍宣重光

和貞各詣極崇耿交揮揚後來闕衡傑闡述爛昭章
匪是啓靈秘正途已微茫願子奮遐躅整策趨康莊
明明吾所懷暨暨宜力將幽獨靜自憫內視德甚涼
方忻麗澤益垂析情增傷遲子即來旋緬跡鴛鴦行
墜緒俟並緝他岐異同攘重開萬古昏再覩斯民昌
深期實在茲抱瘞語莫詳行當重執手毋使熱中腸

次鄭好義見貽韻 五首

鄭子好古學天機靜而深冲然舞雩詠中有咸韶音
茅舍帶流水琴書闕清陰遊魚戲晴波好鳥鳴遠林
那得一咲樂洗此千古心

赤驥困阜櫪垂頭避駑駘王良振長轡蹴踏風雲開
古來功名際何代無竒才當其未遇時誰免蒙塵埃
丈夫亮有命勿使心顏頹

少時見白日意謂手可扳仰天邈無階狂走徒顛顛
尺綆愧深汲寸管無全斑聖途千萬里用力恒苦艱
安得驟飛龍倏爾升天關

勿安老丘壑千載想高情鄙哉華子魚軒冕良可輕
功名世不少孰與節義并至樂有天貴苟得非吾榮
臨風發長歎欲爲智者評

山中一樽酒慰此離別腸清夜步廣庭大星吐寒芒
向來負竒氣舉目空四方栖遲盛年至留滯天南荒
君看升帝閑不必真乘黃

乙丑中秋在石鏡精舍同士友翫月後二日家
兄寄示會飲分韻諸詩覽之悵然歎不得與因
奉次來韻兼柬鄭君好義

四首

我來南山中正見秋月圓我家豈無此兄弟况滿前
胡爲輕別離顧影清輝寒賴有座上客共結無窮歡
愁端旋消釋言笑各開顏寄謝兄與弟明年相對看
秋霽月正好山谷氣逾清風簷敞虛牖愛此萬里明
嘉賓自遠至樂飲暢高情雄談振林谷頃令懷抱傾

空二虫吟

翩翩暮光螢燭舉競飛附沒身煙焰間至死終不悟
日月衆所瞻嗟汝不一顧雖有向明心所從良已誤
喧喧秋後蚊白日嗜我肌我雖病無力掃撲亦易爲
憐汝營一飽未得死及之且復縱遣去天運自有時

郭西精舍士友同宿

淹懷終歲思幸際清宵會情深新喜集語愜孤愁退
離居積頑鄙處下多尤悔倦翻謝騫騰羈蹤損貞介
含悲靜自慨抱獨招群怪非子不我遺斯心復誰賴
天寒四野寂雲歛踈星大霜葉響枯條水灘咽鳴瀨

振衣逞玄覽妙趣超塵壒靜泝一氣先虛涵萬象外
林泉皆道情縻組本天械擺落已遺榮過從敢辭憊
祛疑異閎論立儒佇明誠頽風倘可還勗德期無懈

追次文公先生歲莫燕集韻二首

靈臺湛無爲一念寂不起外物紛相交飛揚千萬里
哲人善操養淵澄復山峙所期天爵脩詎以貧賤耻
豈無華軒客膏粱飫頑鄙道義竟無聞放浪徒自喜
滔滔從俗化悄悄爲誰美知言世所難感歎何時已
賢豪居廟堂四海爲興起時乎有不遇淳風化閭里
用爲江河流處作喬嶽峙所逢異通塞內省無欣耻

卷之二十三
叢桂困荆棘時來吐芳馨物生尚有待吾意詎無成
且終良宵會難值衆美并酒酣發長嘯似聞鸞鶴聲
惟恐日易出顧影遶庭行

開樽酌月華酒味清且醺吐氣長風生吹滅天際雲
此身與宇宙誰主復誰賓有生道爲貴萬事何足論
苦節慕夷齊延年稱羨門僊凡兩冥漠奸雄猶啖吞
山棲未爲隱頗喜離俗氛固窮固非潔用世豈吾仁
昏昏坐平日兀兀行薄暮豈乏往來人幽懷寡清晤
辭源湮曩濬理窟增舊銅幸子有佳期欣然寫衷素
玄談相應發妙理獨超悟頗憚尊酌煩易覺光景度

拙身遠道遠高世遭衆惡勉矣循大中心期永無斃

含悲題山水

昔隱林壑中不知林壑美今來在城闕見之心輒喜
楓林新受霜茅茨隔秋水安得呼扁舟遨遊五湖裏

楊柳渡

殘月墮瑤天涼風在高樹人行野色分鳥嘯巖光曙
川平愜幽眺境勝遺塵慮日出小舟橫依依楊柳渡

宿夾江寺

昏開覺山近院涼知雨足淡月透疎櫺流螢度深竹
心空慮仍澹神清夢難熟起坐佛燈前閒抽易書讀

翩翩暮光螢燭舉競飛附沒身煙焰間至死終不悟
日月衆所瞻嗟汝不一顧雖有向明心所從良已誤
喧喧秋後蚊白日嗜我肌我雖病無力掃撲亦易爲
憐汝營一飽未得死及之且復縱遣去天運自有時

郭西精舍士友同宿

淹懷終歲思幸際清宵會情深新喜集語愜孤愁退
離居積頑鄙處下多尤悔倦翻謝騫騰羈蹤損貞介
含悲靜自慨抱獨招群怪非子不我遺斯心復誰賴
天寒四野寂雲歛踈星大霜葉響枯條水灘咽鳴瀨

振衣逞玄覽妙趣超塵壒靜泝一氣先虛涵萬象外
林泉皆道情縻組本天械擺落已遺榮過從敢辭憊
祛疑冀閑論立儒佇明誠頽風倘可還勗德期無懈

追次文公先生歲莫燕集韻二首

靈臺湛無爲一念寂不起外物紛相交飛揚千萬里
哲人善操養淵澄復山峙所期天爵脩詎以貧賤耻
豈無華軒客膏粱飫頑鄙道義竟無聞放浪徒自喜
滔滔從俗化悄悄爲誰美知言世所難感歎何時已
賢豪居廟堂四海爲興起時乎有不遇淳風化閭里
用爲江河流處作喬嶽峙所逢異通塞內省無欣耻

紛紛夸毗輩患失誠足鄙屈身營所欲易愠復易喜
人生貴聞道外物豈真美千載簞瓢生令聞傳不已

歲除祭先奉懷家兄次文公先生病中呈諸友

韻

日月行不息我亦少安居違家今幾何忽復五載餘
微官悞人事解令親者踈每思別時語不見空中書
及茲歲將闌感嘆正躊躇祀先具薄奠撫已懷厥初
觴酒豈云乏獨酌悶難祛寧當解組去御子花間車

游石鏡山訪親友會集諸公回途有作

世道久凋喪斯文難合并駕言山中遊來與子同盟

高齋在深谷側徑防險行白日亦蕭散惟聞絃誦聲
開筵動芳酌與客張華燈持盃恣歡譁聯床如弟兄
凌晨起盥櫛披襟瞰前楹霜林凋綺葉秋花吐奇英
百靈競紛集萬象森羅迎佳趣心已領新詩誰與評
良會不可常俗慮仍相縈登途數回首暫別難爲情
迴溪屢曲渡清流堪濯纓離離莫雲合矯矯孤鴈鳴
乘高望遙火彷彿識巖扃勞生幸脫鞅至道思服膺
從君來借榻棲隱謝浮名

再次石鏡精舍會集韻 三首

風日淡秋晚欣此佳會并賢豪昔同調泉石非舊盟

祇應念違別忽作山中行雄談爲絕倒空谷騰歡聲
論詩涉風雅深夜張華燈義交無老少情親如弟兄
齋中二三子侍立環兩楹把酒起爲壽禮秩交相迎
丈人名文章落紙誠世英珊瑚與玉樹對之敢譏評
乃知高世人不爲塵俗縈秋空白雲散悠然暢遐情
嗟予尚稚劣夙心會簪纓沉潛守編簡愁對寒虫鳴
豈知金石韻鏗鏘振林垆重茲領秀句願言當服膺
匪徼一時譽終期千古名

野性淡無嗜不求四美并喜茲二三友同結歲寒盟
願言道義交豈慕青雲行山深寡轍跡地僻無囂聲
曲几列遺編踈籬翳寒燈凝神對賢哲况共弟與兄
幽蘭藹北牖脩竹羅前楹忽聞長者車倒屣欣趨迎
貌匪山澤癯器乃邦國英揚論徹幽邃萬彙隨品評
風雲時動盪川岳互迴縈磊落賢俊姿慷慨今古情
不耽好爵貴飄然解簪纓至今懷令望江海傳詩鳴
竒懷寄竹帛安居守林垆小子來問道仰德思服膺
從茲勉素業不媿知已名
太古日已遠轉覺浮僞并不聞金蘭契豈願同盤盟
浮雲無定態流水難西行滔滔勢利間豈識韶濩聲
翻思機巧徒明滅風前燈閉門絕聞見所親惟父兄

丈人忽來過雅淡振軒楹山禽競喧呼童穉亦歡迎
清詩多古調妙論超時英富貴苟不累貧賤孰能縈
群賢共舒曠萬物屬品評星斗羅竒襟風雲動高情
瞿瞿世儀表濟濟古冠纓孰知枳棘間尚有鸞鳳鳴
鰕生寡交接遊息在村坳偶茲觀美德夙興當服膺
幸托龍門賞終期崇令名

病眼喜郡守見過

目疾不飲酒昏昏心意煩忽聞郡守至出戶強開顏
况覩溫粹姿復聆豈弟言乃知盛名世屬任多才賢
神歡坐忘疲欲起屢相援筍蔬雨餘美細酌林花間

風煖落英過日斜歸鳥喧苦云事填委未暇蘇痼瘕
高位不易居斯民良亦難一夫或凍餒仁者爲悲酸
腐儒實無能教士慚素餐臨觴願有祝早使群黎安

題信可時經歷熨帛圖

聖主恩如天賜帛一萬匹承之錦繡段重之踰金璧
西風摧刀尺將爲君子衣熨貼旣勻調粲粲光陸離
防胡猶未已行役何當歸爲君重着絮此地饒寒威

奉懷太史公用盡字韵

隆替存恒期含生會當盡獨遭誣枉構旣往有餘愍
哀彼草昧初遺黎困戈盾英雄逞割據未暇分牝牡

公來作著龜王畧見封畛上爲宗社鎮下爲邦國準
旂常揭日月鍾磬羅簾篋諷諫陸賈多制作張華敏
格天誠密運恤物涕潛隕氣回窮冬溫力導大川引
竭忠職調護垂老辭疾疢謂可樂桑榆相從拾芝菌
安知事乖謬玄造獨何忍顛頃萬里行流離闔門殞
所餘已無幾猶受飢凍窘自顧受深知無能效賙賑
是非屬公議不以窮達泯終古仰大名昭回配箕軫
紛紛榮辱論百世同一哂三嘆秋風前目送高飛隼

鄰父携酒相飲

夷惠俱可慕清和合天真泪予流俗中豈暇思古人
抱拙耻爲佞遇物展殷勤雖無失已尤事過每自嗔
隣翁偶相訪延坐列主賓爲言林田登願我嘗其新
巨榼傾濁醪鷄黍雜前陳持盃強勸飲禮率意態親
顧予寡德業無以給比隣何階及爾輩愧此風俗淳
酒酣述往事所歷多苦辛却憶全盛時無言指蒼旻
世運有隆替玄造豈不仁父老且少安汝本三代民
九重敦政教萬幾盡經綸行當被嘉澤鼓舞歌聖神
二禽味

鵲噪未足喜鴉鳴未湏憂天道神且遠微物徒喧啾
翰音善司晨不免供肴羞鶴鶴至高潔所識惟林丘

鴻鵠隘八荒但爲稻粱謀文彩羨孔鸞繒繳或暗投
况彼鴉與鵲志非衆鳥儔質陋羽翮短雲霄非所遊
性貪嗜飲啄逐逐不自休飢則搖口吻向人如有求
何能洞先幾兆與天心侔禍福有定命所致各有由
人理固坦夷鬼神良昧幽苟中存仁義自可無愆尤
何須浪悲喜爲禽鳥誑壽來寅慰韓愈惡聲感黃州
好怪失所守二子非英流吾方友千古遠法孔與周
考祥視素履樂道以夷猶

敬次張南軒贈朱文公韻送董公

昔忝國士薦觀光帝王州強言酬顧問流汗對冕旒

有詔試文章下筆心懷若遇朝東閣下獲與夫子遊
夫子燕薊來氣貌何休休至尊重純德特爲儲王留
出入朝兩宮寵恩正綢繆予時報聞罷歸飯田間午
升沉本命分出處非人謀安知十載後握手梁山幽
虫鳴月耿耿鴈度風颼颼話舊若夢中一咲忘百憂
况兹林泉窟足以寄真搜仰看岷峨峯俯視江漢流
敬慎以爲楫忠貞以爲軸居夷聖所欲勿憚道阻脩

題童賢母卷後

南山有喬木柯葉敷重陰匪惟雨露滋土腹根本深
童氏秉孝義兄弟同一心構獲良足多先澤久浸淫

卓哉賢母行鄉邦迭嗟欽婦道盡恭睦庭訓肅規箴
收殍麾廩粟收宗散籩金生業隨日增善積祥慶尋
繩繩螽斯應玉立蘭芽森玄理諒靡僭令德斯鑒臨
垂裕既有始濟美宜自今永言引弗替百世流德音
應教恭賦靜妙軒

世故役群動方寸如旋蓬孰知神妙理乃在玄默中
至人本無爲清明常在躬百念寂不起湛然與天通
庶政或前陳聽斷每從容化原有餘地善應無留蹤
齋居樂康時爐熏颺微風忘言對縹帙端拱師黃農
茲惟文獻邦富庶古莫同載敷嘉靖治會見躋時雍

宋五公

李文靖公

李公安平相雅識極淵永倦倦閔無告扣陛日有請
格君古不易慮國存要領紛然土木興始悟先幾炳

吳文貞公

盛德每多容平世喜迂怪公操鎮靜量不幸當其會
神書祀河嶽王府窮賞賚昭昭知過心寵祿有餘悔

寇忠愍公

寇公社稷臣識遠才亦果張皇澶淵狩佞幸慚計左
青衫老作吏赤子淚交墮宏謨雖不終亦足振媮惰

青溪范文正公

布衣憂社稷此義古亦然桓桓高平志致主二帝前

時屯道難合謗息名愈全繼明有良胤千載陋常賢

懷書司馬溫公

傾否難求圖拯溺有遺巧肫肫反正力誠節作動宵

吳群邪競回適善政恣紛擾廢興豈人謀千秋仰元

老

訊瘡

尊生道不足衛生亦無由微痾忽相侵坐為肢體憂

凝冰集寒氣挾纒思重裘虐酷繼踵然締絡不願留

陰陽各用事對處天一陬如何兩相值追逐同仇讐

弱質受摧沮有似中暍牛有耳不解聰有目等無眸

舌不辯辛甘鼻不別薰蕕耳目口鼻官焦然共懷愁

謂此果誰致試與天君籌吾觀今之人紛紜劇蚍蜉

日趨紅塵市夜醉笙歌樓緣情喪恒性縱欲戕天猷

告之養壽命大怒不領頭云胡反無疾健捷如猿猴

方子頗好道少以禮自脩觀其居家庭未嘗暫嬉遊

且食不暇飽夕夢孔與周生疾豈有端天君亦知否

天君聞之笑汝言理誠優子病殆天意皆非汝愆尤

惟天生俊哲蓋為萬世謀大欲扶三綱次欲叙九疇

安能閉關卧縮首鳴啾啾孔孟處衰世奔走摧輪軸
寧不懷宴安此道難中休天令所賦授與古豈不侔
恐其不自強降疾警惰媮方子暫遘疾身疲面無膏
恐見萬赤子病者半九州子能憂斯民厥疾當自瘳
苟徒念一身壽考吾所羞耳受口以告日鼻涕泗流
方子豁爾寤百體頓和柔再拜紀嘉言可以垂千秋

次脩德雜詩韻

三首

通衢夷且直舉世所共知求端迷往轍顛躓終無歸
達人解至理秉心若明曦敬恭視盤鑑齋莊整裳衣
昭昭奉一德暨暨滅衆私爲仁諒茲在彼狂胡弗思

制變易爲失所貴謹未然本心秉靈德洞鑒蚩與妍
譬彼達海流出自山下泉積久諒益深雲濤鼓風煙
始學誠已誤補過幸有年力微道尚遠感此徒煩悁
神龍卧深澤不若抱甕滋白日闕重陰不如寸燭輝
賢豪初未遇但覺吾道非紛紛當途子權勢衆所歸
兩生困蓬藿層取建旌麾斯事自古然今人安足悲
初冬雨中獨坐

吾廬混人群來往劇鼃黽頗欣夜雨來頓使蹤跡屏
滔滔流水障悄悄耳目靜風函試展書佳趣倏已領
平生煙霞癖夙昔慕箕穎抗懷軒冕上雅志星日炳

寧知墮俗流汨沒未獲逞竒懷獨不忘幽念時自省
豪雄外身名曠士賤鍾鼎欲語嗟莫同長歌碧林暝
雜詩四首贈林嘉猷

伊周不治經董賈不言文宏謨塞宇宙高論追典墳
如何末代士操觚動成群但要言辭好不顧心志分
至道豈難行彛倫人共聞勉哉不遠復恭默事天君
循循勇不逮頌頌善或虧古人患才難可以當世推
自吾行四方所見多有之豈乏俊爽流未足慰我思
聖道充天地其微入毫絲非精莫能察非敏莫能爲
致用貴不頗篤守在不移由來賢哲事皆本純粹資

顧予亦陋劣前微亦能追仰止二三友有過頻相規
操行一不慎坐取終身憂發言一不思或爲萬世羞
過小莫吝改進德勿厭脩誰能百無爲自致孔與周
載籍彌九有群言劇毫毛棄置患術踈窮探畏心勞
何由領其要可使道藝高聖學亂百家黍稷雜莠蒿
良農善別識培溉復芸薶取大成吾身致用同伊臯
彼哉溝澮魚豈足連九鰲

次韻贈國亮經歷

君侯昔筮仕匹馬之幽并先子守東藩始結鄰壤盟
寧知十載後握手山中行鬢髮白欲盡韜光復潛聲

話舊若夢覺痛飲張華燈尚欣古義敦愛余均父兄
雨洗秋色淨群山擁前楹山鳥喜客來飛鳴似相迎
緬思天下士公是世外英流俗何所知紛紛好議評
莫邪雖在土龍氣上迴紫自非水鑑識誰知江海情
談詩較李杜起舞笑絕纓大音久闕寥厭聽寒蟲鳴
麟鳳居空谷何由在郊坳處世媿郭泰通家慚李膺
巖棲倘有約相與棄榮名

雜詩四首

相如妙文辭高處無與敵多財爲身累終老汗名蹟
人生取予際千載觀今德苟富何足論喪節良可惜

好名未知道古人有揚雄著書欲傳世不暇脩厥躬
聖言德之餘屈伸與天同哀哉大節廢豈足稱固窮
賈生信英才蚤識當世事身逢致治期遇主亦天意
道高固難合流俗工媚忌一死尚足多千秋想奇氣
幡幡甫井人出納量錙銖積財至千萬侈然夸有餘
華堂古廣陌列肆通通衢朝餐聚俠客莫飲羅名姝
一朝與法遇家破及妻孥金玉歸縣官不能贖其軀
郭解旣夷滅季倫亦門誅安知子原憲窮巷歌唐虞
千介脩德以詩寄次韻

藜羹淡無和腐粟春難圓羞將饋俗賓歡笑置子前

子豈乏梁肉對之每欣然云胡恐費我來往動經年
子行信勞止吾道良足憐深期挹嘉話不必枉華牋
抱疴百日卧欲言無與朋敦敦守一床髮脫影如僧
豈惟形容悴智識無由增視此不棄捐子心一何弘
細人忘名軋俗士爲利慳孰能使余慕君子固有恒
營營苟得者忍以利易生徇欲遂忘反捐軀匪其情
古人崇仁義講切極粹精於斯弗自得猩狝垂紳纓
貴有不足懷賤有不足輕景公徒千駟子真豈其卿

再和并簡林嘉猷

夜光自有輝不因磨礪圓騏驥自致遠不以鞭策前

古來知道者天質固使然師友發其微成德在早年
余少稍有慕今也反自憐子誠肯開我嘉言著來牋
十年窮取友四海幾得朋豈惟得吾徒旁及老與僧
自昔得王子勃鬱氣爲增子才信已毅愧我德未弘
所患涉道淺未免臨事情何由與子隣講習日可怖
溫溫我所愛處子有林生匪惟質柔嘉迥出遺世情
從我南山遊斲雪煮黃精共悲狙喜怒靜閱猴冠纓
生也尚審思勿言帚布輕巍巍孔子孟業豈以爲公卿

送一宗和尚次蜀王詩韻有序

成都大慈禪師欽公一宗與余皆天台人雖

所趨殊途而相見萬里之外有足樂者今將
暫還故山謹次賢王殿下賜草堂長老詩韻
以寓別情里中故人有相問者幸爲謝之
浮雲出山中浩蕩隨去來來非有所係去亦忘所之
若人釋門秀矯矯孤鶴姿林泉三十年喜譽如波馳
平生西方學所蘊未及施一朝忽乘興來謁岷峨師
微笑坐談空傾城走群緇遂令好事者懶問子雲竒
清香焚柏子細雨洒楊枝相逢話鄉曲塵尾不暇麾
越蜀萬里途各處天之陲胡爲偶至此欲語忘其辭
歷歷世間事星星髮中絲迢遙無所嬰老大祗自疑

巴江復舉棹故廬訪遺基散懷天台月濯足槽溪漪
我亦倦遊客歸耕有深期身在華山陽夢繞大海湄
徘徊將何說祇恐負明時

家兄寄中秋會飲詩因分韻述懷以答

時過不自惜長年轉多憂壯心若湍水湧激不少休
念昔童稚日此身百無愁良宵見明月喜躍如有求
大母方壽康諸祖未白頭開筵羅廣庭蔬果間殽鱸
先公奉觴起叔父迭獻酬玉立四五人文采皆琳瑯
酒行聞雅歌鹿鳴和呦呦豈無辨難言禮義皆先猷
脫畧輕萬事高視曠九州每卑楚漢業或誤良平謀

奮袖時抵掌舉筯借前籌座間二季父豪俊邈無儔
慷慨頗逢蠶起自許公與侯酒罷寧復眠長吟倚危樓
夜闌得秀句叩戶來相投我時被鍾愛兄弟共譁咻
席賓欲亡酒輒笑牽衣留轉眼二十年存亡兩悠悠
庭闈音容絕門戶變故稠巢壞鶴上天雷行龍脫湫
惟餘老仲父衰髮對清秋今歲月最好我適南山遊
含情面尊俎感歎蓋有由伯氏欲相寬新詩遞來郵
發函清淚墮紙濕不可收未思舊所見一往如川流
于今會飲歡頗似昔日否我家勢運謬難與時人侔
譬彼百年屋不足施雕鏤願伯善扶持重使楹棟脩
庶免傾壓虞百口蒙庇庶我愚更懶惰樸學愧前脩
術踈何所成言高每難讐空懷濟物志夢寐談孔周
歲華易爲度自哂等浮漚長恐墜遺業上貽先人羞
伯也幸閱我正救愆與尤復爲戒諸弟敦睦無相猶
道德在詩書爲生視田疇天倫苟足樂外物皆懸疣
骨肉豈異人風波同一舟持家尚禮讓處衆貴和柔
堂構倘樹立梓杞加丹髹重還當時盛豈恃才藝優
世欲登虞唐吾將老林丘終期友愛樂黃髮叙綢繆
深衷久有懷對月偶歌謳歌竟視天宇寒光衝斗牛

寄好義

同鄉不相見動涉秋去春何意忽來翔會合當茲辰
雄談有遠趣文采驚世人譬彼隨和質衆目咸知珍
陋俗乏竒士懷抱鬱未伸每思伊葛流磊落展經綸
志大固難售心孤邈誰親君來起我意頗覺氣爲振
炳炳千古事悠悠三代民舉首視大荒汗顏慚此身
深衷非一端欲語未及陳胡爲復求去重使別恨新
夙負江海情耻爲兒女仁賢豪日衰謝感歎易悲辛
涼風吹碧海月露洗高旻酒至且持飲言歸何所嗔
送友人之雲南教官
地遠會面難情深嗟別速今衝微雨去欲向誰家宿

山城碧雲裏菊含清溪曲莫厭官寂寥終期化夷俗

巾山晨望東錢克溫

月落江水明踈鐘發林杪濛濛山氣合歷歷川光曉
妙靜玄化機縱意辭動表悠然悟真趣忽覺天地小
是身本無累萬事相紛擾願釋經世情於茲共幽討

閒居偶題

雨歇堦草淨鳥鳴叢竹中偶無輪鞅過遂與山林同
晞髮庭際日振衣松下風自非捐世故誰得此相從

勉學詩二十四首

殘燈結成花枯木化爲菌凋零如此物秀氣終未盡

人心最靈智自棄獨何忍聖門本弘大梯磴多接引
曾高愚魯資直解配顏閔流年急如箭髮白難再鬢
及時不努力老大成蠢蠢

樹木生有枝子弟教及時七年異男女八歲分尊卑
二五學書計逢人多禮儀二五學射御四五加冠綏
今來謾不省古道當如茲欲作高高臺爲爾寬作基
欲求深深井爲爾遠爲期不聞鄒孟學還自俎豆嬉
人材日衰少善保膝下兒

兒童聚嬉戲不離父母傍父母顧盼之百憂爲爾忘
惟此慈愛心比同春光陽和透地脉草木俱芬芳
兒身已長大能不念往常愉色與婉容傾心奉高堂
嗟哉力何短父母恩甚長

上堂拜父母甘旨手自供入廟羅豆籩祀我祖與宗
死者魂魄安生者恩義隆一門無二志誓歆生春風
豈惟董閭里上聞天九重祥雲及膏雨滋我庭下松
孰云唐虞遠不得身遭逢由來豪傑士世世皆時雍

藹藹桑梓樹遲遲杖履音未瞻父母顏已起恭敬心
樹木手所植杖履身所任此物猶足重况彼鍾愛深
父愛我亦愛不間獸與禽六親同骨肉何以能相侵
莫驅屋上烏烏有反哺誠莫烹池中鴈鴈行如弟兄

流觀飛走倫轉見天地情人生處骨肉胡不心自平
田家一聚散草木爲枯榮我願三春日垂光照紫荆
同根而並蒂藹藹共生成

妻賢少夫禍子孝寬父心不知何人語相傳猶至今
室家兩相好如鼓瑟與琴二親豈不驩花木羅春陰
雖云一樽酒共酌還共斟物情動相失安用儲千金
家睽在婦德彘繫有遺音

內則記孝養檀弓著哀思寥寥三代音於此猶見之
我欲繪作圖豈乏丹青師丹青狀形體性情那可爲
冬夏適溫清芳鮮在盤匱二親未飲食如子湯藥就
奈何報本心限以百歲期飛鳥失其巢尚且鳴聲悲
創鉅痛亦深衰麻交涕洟聖王爲制禮進退隨天時
千人萬人心一人心可知

譙人夏侯氏有女志獨高夫家盡蕩滅節義終持操
榮華昔共享禍患今同遭妾身偶生存志已埋黃蒿
親戚勿訝我人類異羽毛引刀斷耳鼻見義不見刀
至厚莫如地桑田變波濤真金不畏火見此女兒曹
結交須結心取士須取德古交金不鍊古士麟五色
如何當世人作事多傾側甘言轉相媚內險不可測
青青好禾稼生此螟與螽堂堂美少年化爲狐與蠃

人心天機在利欲日夜昏好苗莫助長惡木先除根
斧斤一時緩惡木何由斷莫畏根株深所憂筋力短
吉人語何少凶人語何多言亦反覆簡默終無他
可磨白圭玷言玷不可磨有口號談天有辨誇縣河
心原一已放觸物生偏頗悠悠百年內榮辱當如何
驅車入東洛策馬上西京所遇何表表莫非公與卿
旌旄出廣路百步辟人行前駟與後擁不絕如雷轟
人生處困阨孰不思寵榮此途良足樂此任苦不輕
丈夫誓許國身作萬里城未懷鼎足戒毋使公餽傾
五行各異氣萬物無全材聲當配匏竹味即調鹽梅

何器不適用有根當復培山中多松柏城中多第宅
孟嘗千金裘一狐難取白

田單拜齊將即墨乘孤危群心倣死鬪燕士不敢支
一朝寵祿盛惜身思自持人敵竟不下大寇空若箕
功名每如此樹立終陵夷國家匪憂危寵爾將何爲
動懷首鼠計退與災禍期向非魯連子身死節亦虧
鸞凰寡儔匹玉樹少枝柯貴人在高位骨肉苦無多
輕車駕駟馬妙舞隋清歌獨樂不如衆中心欲如何
東家借一軸西家求一梭織成十丈幕周我堂之阿
至親隔咫尺舉首如山河

人生四海內同作兄弟看一夫向隅泣滿座爲無歡
豈我無衣裳念爾飢且寒豈我無梁肉爲爾不能殮
群生本一原有此惻隱端胡爲自汨沒功利日相殘
辟如同母兒給之豆與簞奪彼以與此終非心所安
飲馬長城窟窟中水無多秋風動百草水面亦生波
長城備外侮室內起干戈非關絕地脉乃是傷人和
不見豐水上靈臺鬱峩峩前有大雅詩後有秦民歌
鍾塗得苦水流毒如江河

黃河西北來云自崑崙坵經行非一山回薄半九州
上有不測源下有無盡流萬化同此機不知幾春秋

分明天地心不爲淺狹謀癡人用小計顛倒若無求

安得申韓氏化爲古伊周

長安華里前

布帛文被體粟菽味充飢常人未識察往往爭好奇
貪竒不願寶刻成無當卮大鈞播萬類瑣細各有宜
得時易長養失叙徒施爲哀哉楊朱淚滴向他路岐
正途亦甚坦舍此將安之

不愛其民與世

蜘蛛解布網蝓蟻能轉圜萬物各有役何人得安然
周公貴爲相仰思夜不眠仲尼大聖人易書三絕編
孰謂我有耳不聞古所傳一聞敢自墮勇志如奔泉
好龍非真龍藻繪等兒戲懼虎思虎傷聲容凜然異

六經豈虛文中有無盡意一從河出圖光景不可闕
皎皎如日星悠悠在天地青編積几閣翻閱何容易
曾參之一唯已往難再值
勸爾一盃酒君行莫匆匆君心雖欲速道路久乃通
東可窺大壑西能越空同不憂歲月晚但憂筋力窮
三年刻片楮九年成一弓制作雖云難爲藝則已工
小事可喻大願言置胷中
離離園中樹花開動無數或紅如丹朱或白如瑩素
今日正自佳明晨不如故易盛還易衰浮華眼前度
物情何參差天地均雨露南山有松柏壽並金石固

臨海縣知縣黃誥

黃巖縣知縣張師善

台州府儒學教授尚芳

訓導李深

黃巖縣儒學教諭文程

府學生陳縝 葉琰 王梅齡

臨海縣學生李臨鄉 戴濟之

黃巖縣學生孫思光 牟汝鈞 校對

遜志齋集卷之二十三

遜志齋集卷之二十四

中順大夫浙江按察司副使奉勅提督學校雲間范惟一編輯

奉政大夫浙江按察司僉事奉勅整飭兵備南昌唐堯臣校訂

中順大夫浙江台州府知府事前刑部郎中東吳王可大校刊

蜀王殿下賜行厨酒膳奉謝

天門傳詔飛金符帝子發春朝帝都萬里巴江引軸
轡朝離瞿塘莫荆巫牙旗羽扇照江湖馮夷操楫龍
伯扶威振海若驚天吳袞衣登朝玉陛趨至尊撫問
情鬱紆奏還大國天語俞却從周秦行坦途乘傳西
來試馳驅日行三百尚未晡親藩留宴窮歡娛秦民

擁路觀金輦口稱盛德目睢盱共說賢王世所無南
入荆門喜氣蘇蜀邦密邇忘崎嶇山花爛熳雲糝糊
綠樹清江如畫圖漢中小臣章句儒早向王門曾曳
裾是日來迎拜路隅按轡遙看咲且呼暮抵行宮侍
直爐華燈照夜舖攬揄從容前席講典謨玄談蟬聯
如貫珠上探千古周八區鄙諂榮辱聖爲徒更闡喜
極行玉壺叩頭舉白紅生膚侍臣奉教恩意殊大官
美醞貯行厨特賜歸飲不用沽上尊珍味甘且腴受
之無功辭有辜心感王恩厚矣乎獻諸祖禰頒妻孥
招致朋僚洗囁觥共飲相歡同賜醕平生飲水兼茹
蔬祗將鉛槧代耕鋤近爲校教食民租尸居靜閱年
歲徂世人視之等泥途賴逢聖主意氣孚討論聖猷
師古初經綸萬理髮在梳小臣學術本麓踈志廣年
荒才更迂量同溟海肯納汗欲致衆駿先收駑願王
道德爲世模摩撫疲瘵恤鰥孤南漸瀘戎北羗胡陽
和發生無朽枯育民興賢語不誣行致孔明與夷吾
共康國政秉事樞保釐西土佐唐虞不數蠶叢及魚
鳧吾王端拱化日舒從此感恩非一夫

歌風臺

歌風臺下春水黃歌風臺上春草碧黃河之水日夜

流碧草年年自春色漢祖當時爲帝王龍泉三尺飛
秋霜五年馬上得天下富貴樂在歸故鄉臺前老人
爭拜跪拄杖麻衣見天子龍顏自喜還自傷一半隨
龍半隨鬼翻思昔日亭長時一心捧檄日夜馳即今
宇宙過四海一榻之外誰撐持却令猛士鎮寰宇安
得長年在鄉里可憐創業垂統君后使乾機付諸呂
淮陰少年韓將軍金戈鐵馬立戰勳截弓烹狗太逼
迫解衣推食何殷勤致令英雄遭婦手血濺紅裙當
斬首蕭何下獄子房歸左右功臣皆掣肘還鄉悲唱
大風歌向來老將今無多咸陽宮闕親眼見不忍刺
棘埋銅駝臺前老人淚如雨爲言不獨漢高祖古來
世事無不然稍稍功成忘險阻荒祠古廟名歌臺前
人已盡今人哀感激悲歌下臺去斷碑春雨生莓苔

潼關

潼關將軍才且武五千士卒健於虎朝廷養汝爲阿
誰盜賊公行如不覩昨日官車將到關西風放顛塵
滿天錢囊衣篋繫車後歛來掣去同鷹鷂南望京師
五千里僮僕所資餘有幾離家漸遠親故稀向我長
號淚如雨嗟嗟僮僕汝莫愁聖人在上治九州會看
海內皆富足關不須防無盜偷

淮陰

淮陰城頭落日黃淮陰城下秋草荒古城西繞淮水
長猶如背水陣堂堂當時大將功無雙顛羸蹴項勇
莫當丈夫何乃爲假王至今遺恨令人傷漂母一飯
千金償解衣推食那敢忘相君之背貴莫量蒯生此
語無忠良慎弗出口遭吾撞歌風帝子歸故鄉思得
勇士守四方胡爲鳥盡良弓藏

題嚴子陵

敬賢當遠色治國須齊家如何廢郭后寵此陰麗華
糟糠之妻尚如此貧賤之交奚足倚羊裘老子早見

機獨向桐江釣煙水

赤壁

東夏口西武昌赤壁峭絕當中央奸雄將軍氣蓋世
敗卒零落慚周郎得鱸魚沽美酒孰若黃州蘇子瞻
謫向江湖動星斗噫吁戲曹公氣勢蘇子文章人物
銷鏢塵跡荒涼惟有江水千古萬古空流長

吊李白

君不見唐朝李白特達士其人雖亡神不死聲名流
落天地間千載高風有誰似我今誦詩篇亂髮飄蕭
寒若非曾中湖海闊定有九曲蛟龍蟠却憶金鑾殿

上見天子玉山已頽扶不起脫靴力士祇羞顏捧硯
楊妃勞玉指當時豪俠應一人豈愛富貴留其身歸
來長安弄明月從此不復朝金闕酒家有酒頻典衣
日日醉倒身忘歸詩成不管鬼神泣筆下自有煙雲
飛丈夫襟懷真磊落將口談天日月薄泰山高兮高
可夷滄海深兮深可涸惟有李白天才奪造化世人
孰得窺其作我言李白古無雙至今采石生輝光嗟
哉石崇空豪富終當埋沒聲不揚黃金白璧不足貴
但願男兒有筆如長杠

題李白觀瀑布圖

天寶之亂唐已亡中興幸有汾陽王孤軍疋馬跨河
北手扶紅日照萬方凌煙功臣世爭羨李侯先識英
雄面沉香亭北對蛾眉眼中已見漁陽亂故令邊將
儲虎臣爲君談咲清胡塵朝廷策勛當第一珪組不
敢縻天人西遊夜郎探月窟南浮萬里窮楚越雲山
勝地有匡廬銀河掛空洒飛雪醉中信馬踏清秋白
眼望天天爲愁全閨老奴污吾足更欲坐濯清溪流
英風逸氣掀宇宙千載人間寧復有夢魂飛度南斗
傍咲酹廬山一卮酒雲松可巢今在無九江落照連
蒼梧欲從李侯叫虞舜盡傾江水洗寰區

題李白對月飲圖

明月出高樹上懸青天中下有萬頃之長江揚波泛
彩清若空江風吹人色淒凜此時對月誰能寢十千
斗酒何足論舉盃宜就花前飲花前飲酒無與儔酒
酣意氣輕王侯仰招行雲不可得但見月與河漢俱
西流僊人伐桂樹玉女倚瓊樓顧盼暫相悅棄去終
莫留昨日已浩浩今日復悠悠人生如飛光及時不
飲空白頭君不見月中玉兔搗靈藥不能醫此萬古
愁何如醉卧長不醒天地與我同虛舟混混六合間
浩然何所求

徽宗花鳥圖

宣仁升遐司馬死宋祚當時已中否豈知禍亂猶未
休更立端王作天子簡書四出捷星馳重見熙豐舊
設施太室既崇荆國祀朝堂新刊黨人碑廷臣往往
多鉗口四海禎祥無不有萬金寶藏造池臺千里樓
船載花柳君臣自詫文德修不數唐漢追商周陳鍾
考鼓按雅樂厲甲揚戈昧遠謀宮中從容萬機暇酣
飲逸遊忘晝夜御輦時過宰相家微行或飲倡樓下
宣和殿內玉屏風綺席金爐處處同詔遣內官宣畫
史時拈象筆極形容神機密運回天巧萬歲齊呼盡

稱好玉礪裝軸錦裁題墨署花書朱篆寶心怡意適
藝愈良自道丹青過百王盡將兵籍副邊將還信奸
臣斥俊良契丹滅後金人喜猶剖王封賞闡豎露布
初騰紫陌塵天驕已渡黃河水汴京鎖鑰一時開雉
扇鸞輿去不回圖書萬卷入沙漠奎壁無光天爲哀
祇今俯仰三百載南北興亡幾更改廢陵已發社無
基尺素誰家尚收在吾知此畫非人爲當有神物常
呵摩故留花鳥在人世要俾後來懲戒之古來君德
在仁義小技雖工何足計不見昭陵一藝無備績鴻
名照天地

錢氏家山圖

錢君望鄉勞夢思陳君奮筆爲寫之毫端歛吸驅鬼
物風霆捲地山川移紫雲峯高當面立獅子灘聲轉
山急翠竹搖風市塵遠青楓夾路樵歌入山脚盤迴
到石門桑榆深映數家村百年丘壠澤未泯中古衣
冠今尚存高堂老人年八十皓首紅顏瞳點漆柴門
拄杖望兒還坐聽庭鳥心若失錢君一見增喟傷此
身如在淮水傍摩挲門戶欲歸去細看無路墮渺茫
乃知陳子善戲劇故假丹青惱胃臆世間萬事無不
然畫地作餅安可食陳子亦是憶家客不特戲人兼

自釋沙際扁舟已上檣何當共載歸故鄉

題南屏對雪圖

昔年歲莫京國還艤舟夜宿南屏山山風吹雲天欲
壓夜半大雪埋江關清晨倚樓望吳越六合玉花飄
未絕恍疑江水駕山來萬頃銀濤湧城闕山僧好事
喜客留置酒開筵樓上頭玉堂僊人宋夫子紅顏白
髮青貂裘坐談今古如指掌共看雲收月華上寒輝
素彩相蕩摩碧海瓊臺迭蕭爽酒酣擊節心日開慷
慨弔古思英才荒祠古柏岳王墓廢湖殘柳蘇公堤
一時嘉會難再得僊人上天塵世窄王子何年繪此
圖正貌南屏舊遊迹吾知王也奇崛人新詩妙墨俱
絕倫偶然揮洒豈無意神授髮髯存天真世間今古
同飛電回首人豪都不見空有羅山石室書夜夜虹
光射霄漢

江山萬里圖

我昔奉勅辭金闕西下巴川持使節僊槎二月出龍
河萬里春風掉晴雪吳江茫茫入杳冥棹歌初過峨
眉亭錦袍不見李供奉白雲遮斷三山青烟蕪漲綠
知何地白鳥雙雙沒淮樹片帆風滿疾如飛矯首驚
看坼流去大孤小孤橫雪波匡廬五老青差我九江

秀色嘆竒絕半空飛瀑懸銀河推蓬竟日閑吟倚瞬
息舟移洞庭水君山如黛壓中流十二煙鬟鏡光裏
好山遠自峨眉來瀟湘練明天際開疑峯九點落空
翠重華孤墳安在哉武昌地轉多遺迹隔岸鳥鳴瞻
赤壁烟焰旌旗魏武兵綸巾羽扇周郎策扶醉曾登
黃鶴樓漢陽城對鸚鵡洲即從鄂渚擢明月沂流直
上窺荊州夷陵山勢多重疊楚樹蠻雲遠相接欲向
夔城入錦城還於巴峽穿巫峽神女峰前路欲迷瞿
塘灩澦聞猿啼五溪越盡見雲嶺但見鳥道青天低
萬里橋西看立馬足迹經遊半天下愧無草檄擬相
如咲擲橐金輕陸賈今年詔許臨丹丘夢中往往驚
羈愁江山誰寫入圖畫眼中歷歷如經遊岸巾一覽
發長嘯滿襟爽氣高堂秋

如題王叔明墨竹爲鄭叔度賦

吳下王蒙藝且文具興趙公之外孫黃塵飄蕩今白
髮典刑遠矣風流存華亭米芾稱善畫每觀蒙畫必
歎詫謂言妙處逼古人世俗相傳倍增價昔年夜到
南屏山高堂素壁五月寒壁間舉目見修竹煙雨冥
漠蛟龍蟠呼童秉燭久不寐細看醉墨王蒙字固知
蒙也好天趣畫師豈解知其意分枝綴葉人所知要

卷之二十四
九
外枝葉求神奇天機貴足不貴似此事不可傳諸師
麟溪鄭君好奇士愛畫猶能賞其趣嗚呼世間作者
非不多鄭君甚少可奈何

失硯嘆

吾家石硯玄玉色來自扶桑海中國盪摩日月露光
精吞吐波濤含潤澤天生奇質爲世用海王龍伯不
敢匿少時得之方外人四座傳翫皆歎息二十年來
親翰墨北走洙泗西梁益錢塘會稽屢遊歷鬼神呵
護同琪璧水怪山精皆辟易佐我爲文寫骨髓上探
玄化與爲敵宣暢民彝輔皇極雲雨布濩飛靈靈

忽變遷靡定迹謬致聲名驚四方招謗速侮不煖席
其間損益兩相補硯也於余良盡職豈知萬事不可
料昔者相親今不得潼關群盜何大劇竊瞰行人俟
昏黑金錢雖失不足歎此硯使我深痛惜我非玩物
有偏愛又非昧理苦蔽惑直傷美器不遇主有似賢
才受驅迫直鄉奉使陷叛臣蘇武持節幽異域忠肝
義膽貫天地豈忍包羞汙凶逆孔子春秋至謹嚴細
事不肯登簡策大弓寶玉二物耳特書盜竊懲亂賊
我誅鼠輩恨無力著作有心禪六籍何時見汝生羽
翼奮飛重來侍吾側不然變化爲星辰照臨下土常

卷之二十四
烜赫外物聚散如置奕胡爲念汝長戚戚君不見自我得之失無憾不如蕭公差達識

扇

寒藤陰壑懸風霜剝皮擣骨收溪光銀漢半邊秋月
白瑤臺一幅春雲香青旗翠纛湘潭竹寶刀纖纖破
寒玉束來十二碧琅玕鳳骨凝香冷盈掬吁嗟造化
由天功乃知製作歸良工膠漆投情作鸞偶卷舒懷
袖生清風清風飄飄可人意忽覺聲名滿天地南州
溽暑恩愛多只恐涼飈入庭樹

紅酒歌

田家八月秋秫黃豚肩滿椽金穰穰西成萬室喜登
場斗酒勞慶年豐祥天台山人傳秘方釀成九醞丹
霞漿紫檀槽頭秋點長絳囊醱壓甘露涼猩紅顆滴
真珠光蓼花色比桃花強薦新設席請客嘗風吹桂
花滿屋香饌出肥鷄一筋肪橙斫蟹鱠雙螯霜不湏
琥珀琉璃觥不湏太白力士鎊我愛真率田家郎磁
甌瓦盆罌木觴爛熳爲我澆吟腸新詩吐出雲錦章
醉來興發恣豪狂高歌起舞當斜陽出門一笑爾汝
忘大江東去煙茫茫

食羊虎肉

白額咆哮振山谷老羝見之驚且伏一朝強弱兩不
存此肉都歸野人腹腹中惟恐相啖吞急呼美酒爲
解紛酒酣一醉更懷古千載英雄羝與虎

蕨箕行

並海飢民千百數携鋤上山斫山土蕨根已盡斫不
休力絕筋疲未言苦屋頭五日無炊煙十步九却行
不前全家性命係朝莫弱子假息阿母眠昨日斫蕨
僅盈斗今日蕨根不滿手但憑斫蕨保餘生再拜青
山感恩厚青山青山爾勿猜明朝未死携鋤來

海米行

海邊有草名海米大非蓬蒿小非薺婦女携籃書作
群採掇仍於海中洗歸來滌釜燒松枝煮米爲飯充
朝飢莫辭苦澁不下咽性命聊假湏臾時皇天不仁
我當死况乃催科急如矢來牟擬作日月期欲保餘
生更後爾嗚呼棄止不復陳椎牛酣酒何爲人

遊峨嵋

楚客求丹梯泝流三峽踰五溪浙僧訪佛祖一錫凌
空向西土江左儒生尋謫仙相逢共上峨嵋巔峨嵋
山高氣磅礴萬朵蓮開青插天天高地遠望無極海
東日出扶桑赤氣衝衲衣舉光搖角巾明眼症汪洋

巨鰲動耳邊髮髯天鷄鳴龍宮對月窟曾聞謫仙遊
霞光疑不散履迹今尚留千崖崩摧勢欲墮羽流緇
侶參差坐七寶巖留供佛燈萬松竈起燒火風霆蕩
滴雲樹模糊虎豹接跡猿猱鬪呼星漢當頭手可摘
靈芝甘露無時無雲漏日兮光一線金蓮白象兮紛
紛而來見萬籟動兮天樂和仙之人兮夜經過忽神
驚而目眩豈事幻而說頗覩謫仙而無有杳鳳管與
鸞車塵心未斷懷鄉土青鞋復踏來時路行行回首
語青山石室無鎖門無關重來有日當躋攀肯效越
趨囁嚅微名勢坐令塵土凋朱顏

題萬間室

少陵老翁餓瀕死意欲大庇天下人一椽茅屋不足
蔽風雨安得萬間之厦蓋覆四海赤子同欣欣言狂
意廣不量力至今世俗聞者交咲嗔侯城小儒愚獨
甚不敢嗔咲謂公之意厚且真古來致亂皆有因大
臣固位謹持祿其計止爲安一身高車大纛耀侈富
子女玉帛驕里隣安危得失百不知更僭膏腴便利
田宅遺子孫生靈窮苦墮溝瀆寒士困悴無衣紳彼
也珍羞綺席歌舞燕樂窮朝昏老翁哀痛實爲此熟
視鄙夫儉子辟之犬鼠加冠巾曰我得志有不爲嫉

邪憤世欲救其弊忘賤貧至今已閱八百歲知翁之
意世獨少蹈翁所惡常紛紛侯城子爲是懼人受天
地中何以不與禽獸草木爲等倫一心運萬化五性
涵義仁下補后土所不能上贊皇天之闢燮調寒暑
撫五辰大禹疏百川伊周綜理禮樂政教與世爲陶
鈞孔子孟軻不得位著書明道亦與治水極世之功
均吾爲孔子徒忍泪流俗同沉淪故題一室曰萬間
坐覺宇宙亭毒氣勢皆前陳身賤不敢論政教誓將
修復孔業爲世開昏嚚室中左右列古書亦有諸史
所筆志義之士忠良臣關有子厚洛有伯淳群公近
出皆鳳麟美哉子厚西銘之說何諄諄吾恐當時亦
感悲歎意故立此論可與日月同光新爲君不知此
無以建皇極爲臣不知此無以康兆民願寫此書千
萬卷洗濯鄙習與私智使知林林之衆皆吾共出而
同娠視之不至越與秦盡變呻吟愁歎之俗若去寒
冱逢陽春小儒不惜獨困處此室作爲雅頌歌聖神
再見中國大治同周殷

雙白滄州趣爲台城趙生孝禮題

少年負竒志味道輕神僊縛虎千仞崖斬蛟萬里川
東指扶桑西月窟以手捫天問天關醉中欲奪羲和

鞭驅策六龍下溟渤歲華忽復晚竒功竟無成恥作
楚狂人甘爲魯諸生俯首蓬屋中被褐勘六經憂多
髮白早觸事萬感盈擬從安期輩採藥遊蓬瀛蓬瀛
群僊別來久聞知掉頭還拍手世上憂勞早已知身
後功名復何有棄我如敝屣不肯相攀援登高發長
嘯日送白鶴歸三山我友王子喬示予海嶠圖孤峯
拔出數千尺丹光雲彩交模糊下臨無地上極無天
漚波浩蕩望不極恍若巨鰲掀舞勢與元氣同回旋
金銀宮闕隱倒景翠綃絳節在眼前對此愜心賞便
欲乘風與俱往恨乏同心人臨岐獨惆悵趙生天資
妙訪我東海頭清談雄辨有僊趣坐覺毛骨寒颼颼
生方讀書取青紫我已屏跡棲林丘他年謝事倘相
會與爾共作蓬瀛遊

許氏龜巖行

寧海許子名續字士成年踰三十事母以孝稱士成
六歲失嚴父母氏裸抱避亂慈溪城于時鯨鯢奮擲
東海沸紅塵滿天波血腥流離異鄉幾寒暑慈母守
義志節如霜明盜平歸來閭里驚母能愛子復善教
紡績衣食使入庠序拜揖從先生所學在大倫耻以
文藝鳴家居近市母不樂又爲迎至龜巖之下養且

耕兒壯母髮白諸孫長大能扶王母行士成歲時奉觴爲母壽踴躍拜舞同孩嬰食有黍稻殺有牲母氏感舊涕泣難爲情士成念母守節苦身賤莫達天子廷每爲鄉閭道母事辭旨悽咽弗忍聽縣令不之察郡守不爲聞朝家有命誰能旌悲哉士成之恨何由平嗟嗟今之人豈無高車大馬垂華纓推恩及父母丘壠沾光榮立身奉法不能謹雖有恩寵無由承身死汗辱增宗族愧醜父不願以爲子弟不願以爲兄孰若士成隱居不仕行修于家馳令名龜巖土厚且沃龜巖水甘且清龜巖之人誰與許子京許子之賢母所令鄉人祝許氏母子年百齡母爲人婦法子爲事親之準繩嘉爾母子孝且貞龜巖之高與天俱不傾樂哉士成配岩永久流芳聲

蜀道易

有序

昔唐李白作蜀道難以譏刺蜀帥之酷虐厥後常臯治蜀陸暢反其名作蜀道易以美之今其詞不傳臯雖惠於蜀民頗以專橫爲朝廷所患暢之詞工否未可知推其意蓋不過媚臯云爾非實事也伏惟今天子以大聖御極殿下以睿哲之資爲蜀神民主臨國以

來施惠政崇文教大賚臣僚及於兵吏內外
同聲稱頌喜悅天下言仁義忠孝者推焉西
方萬里之外水浮陸走無有寇盜商賈駢集
如赴鄉閭蜀道之易於斯爲至矣臣才雖不
敢望白而所遇之時白不敢望臣也因奉教
作蜀道易一篇以述聖上及賢王之德名雖
襲暢而詞無溢美頗謂過之其詩曰

美矣哉西蜀之道何今易而昔難陸有重巖峻嶺萬
仞鏡天之劔閣水有砒雷掣電懸流怒吼之江關自
昔相戒不敢至胡爲乎今人操舟抹馬夕往而朝還

大聖建皇極王道坦坦如絃直西有雕題金齒之夷
北有氊裘椎髻之貊東南大海際天地島居洲聚千
萬國莫不奉琛執贄効朝貢春秋使者來接迹何况
川蜀處華夏賢王於此開壽域播以仁風沾以義澤
家人和裕橐兵歛革豺狼變化作駟虞蛇虺消藏同
蜥蜴鑿山焚荒穢畧水剗崖石帆檣扉履任所往死
若宇宙重開闢美哉蜀道之易有如此四方行旌絡
繹來遊西覽德成都萬室比屋如雲桑麻蔽原野鷄
犬聲相聞文翁之化孔明之仁嚴鄭之節楊馬之文
遺風漸被比鄒魯士行賢哲方回參方今况有賢聖

君大開學館校作論與墳坐令政化希華勛徵賢一詔
到巖穴咄爾四方之士孰不爭先而駿奔王道有通
塞蜀道無古今至險不在山與水只在國政并人心
六朝五季時王路嗟陸沉遂令三代民盡爲獸與禽
當時豈惟蜀道難八荒之內皆晦陰戎夷雜寇盜干
戈密如林今逢天子聖賢王之德世所欽文教洽飛
動風俗無邪淫孱夫弱婦懷千金悍吏熟視不敢侵
蜀道之易諒在此咄爾四方來者不憚山高江水深

爲玉泉山人題

天池直接扶桑東百川委會來無窮兩崖爲門障海

口大江中流潮汐通豐山橫鷲東奔放浪嚙沙崖穿
玲瓏翠鳳飛來白銀闕金鰲湧出金蓮宮天台赤城
此磅礴間氣往往生英雄鴻儒碩士世不乏神靈秀
異天所鍾玉泉山人獨嗜古食貧力士專而工結廬
椒江望蓬島坐看海氣浮青紅含嚼英華嗽芳潤吐
納光景嗟長虹群僊窈窕羅几席洪波浩瀚涵心胷
蕞爾一鄉不滿意邈焉四海將奚從日披黃卷對賢
聖上並周孔齊義農國風雅頌導于正典謨訓誥操
厥中權謀智術競趨利玄談清議咸歸空濛洛崛起
樹名教千載道學開盲聾仁義行師佐伊呂禮樂出

治登夔龍拯救生民布仁化此心炯炯今昔同食息
夢寐若見之上下議論相磨礱論交豈止一世士直
追三代還淳風屈伸去就隨所遇仕止進退皆從容
某山某水吾釣遊歸來舊隱巢雲松

次河南府梅花堂韻

前年停車汴水陽鄭公延我政事堂是時梁園花亂
發遊蜂乳燕春滿墻綠酒浮觴白玉白綉衣耀座腰
金黃豈知造化不容物俊傑俄爲土中骨重來訪舊
無一存冠蓋年華兩飄忽堂中遺跡傷人意粉圖素
壁銀鈎麗道廣常懷濟物心數竒竟負匡君志文章
爛熳空自苦政術廉平索誰繼官僚薦書嗟我遲妻
子思家歸未遂感此臨風涕淚垂出門上道風塵翳
西行境內五百里到處逢人稱善治洛陽城中迎歲
新正思昔日梁園春河南忽過張少府意氣還同鄭
老直蠟梅盈庭花瑤璨銀燭照夜光璘珣登高訪古
隘八極勸酒咲談驚四隣我被虛名浪羈束奔走皇
皇炊不熟明朝又渡瀍水西行李再經燒棧北丈夫
會合當有時各展忠貞報王國

東河驛值雪次茅長史白戰體韻

東河氣高地常冷越客入山愁目瞑蹇馱破帽闖驛

門敞屋踈籬耿燈影更闌藉草始一寐夜半雪來初
未省窻明恍訝鳥繞樹身倦宛同蛙伏井鷄鳴起看
眼生花睡熟山童呼不醒積深已覺擁藍關勢遠直
疑沾庾嶺穿簷入隙如有求塞戶填堦豈須請瓦溝
早滴爲炊煙水面難消因泛梗樂事偏宜壯士獵清
氣先入詩家茗平舖道路混險夷蓋覆乾坤掩瑕眚
空山難行無客到高卧閉門終日靜春來一月尚嚴
凝天上何人調九鼎半生對雪走四方竒絕愛此林
壑景長松壓重龍虎怒巨石羅陳一整北風末勢
更飄揚斜照餘輝愈光烟南望殊憐京關遙西顧頗
覺歸途永未湏玩物遽憂患有形易化皆幻境明朝
陰翳盡掃除天際諸峰翠相並乘興伸眉且一笑人
生飢寒非不幸莫將詩句效蘇公淮陰詎肯儕噲等

愛日堂

白日麗青天朝出扶桑莫虞淵堂上有親雪滿巔坐
看白日心茫然長繩不可繫急景如流川羲和羲和
停爾鞭高堂一日如千年

寄貧

朝飡漿一盂莫食蔬一盤胃中六經粲星斗筆底萬
卷馳波瀾人咲先生窮不恥先生嘆人愚可鄙終朝

醉飽百不知何異腥羶飫螻蟻世上群兒昧重輕每
是螻蟻非先生縱令先生窮至老猶與日月爭光明
覽以德用中二友和東坡喜雨之作

席前衿佩多如雨危坐談經亦良苦講堂日晏未朝
食舌倦唇焦面生土小齋退食聞扣門倒屣起迎咽
還吐知是兩賢送詩至咲却杜康麾陸羽錢也駿馬
氣莫當陳也奔泉勢難禦元祐詩壇不易登俱欲升
堂啓其戶文章由來關政教道術何曾間今古每憐
陋儒不自量詆訶前人竟奚補浪與唐宋較優劣有
如癡兒侮厥母蘇公風骨直天人駭視四海手摩撫

二南洋溢騶虞出九韶鏗鏘鳳凰舞列僊得道行御
風漢相閑居老食乳神奇變化脫邊幅怒罵嘻噦皆
新語眼中不復見此翁雲月江山澹難主我狂自少
喜翰墨辟若惰農服田畝嘆彼么麼星辰出望公光
燄日當年二公豪健敢扳附蓄積穰穰富倉庾大篇
屬和意有餘坐覺詩名動城府當今聖朝任英俊雅
頌再作聲教普吾衰才薄子勉旃振起斯文繼前武
長淮風顛浪雷吼爭渡千人喧渡口蹇馱破帽衆所
輕行李甘心落人後臨淮先生交義深視我重比雙

南金席前弟子總英俊相携擁餞淮之陰就中孫玘
藝且勇奮袖登舟氣增重扶顛禦侮况有人病身幸
免波濤恐掛帆長嘯煙霧開主人謝客綠城回孫也
追隨不憚險艱危可仗真竒才世俗結交看勢利有
勢相依無即棄賤貧如我豈足憐脫落凡情見真意
賢豪邂逅何所無排難多由竒丈夫古人事業望公
等欲輔國步須捐軀

次鄭好義紀夢韻有引

昨承寄示紀夢長句諷詠之餘不勝感歎因
用增至二十五韻以道鄙懷答雅意尚正

教之

竒材偉人世不作太息斯文付冥漠承君忽枉紀夢
篇喜極長吟淚交落雄辭璀璨錯迸星斗險語鏗訇飛
電雹念我雖知意氣真感君復使情懷惡憶昔與子
在京師玉堂老僊侍幃幄冠蓋追趨禁闥深朝廷尊
寵禮數渥聲名如雷動天地震起螫虫伸屈夔國有
著龜民有師水之海濱山之嶽升堂執業集英彥寶
帶朱衣雜南朔朽材浪跡偏見憐繩墨匠持重龔斷
子時好脩美文藝清談劇辨相娛樂公於多士雖並
收視我與君尤不薄龍驥咸歸伯樂廐天球本出荆

山璞要爲國家樹基址屬望吾人興禮樂安知垂老
萬里行直泝岷江踰劍閣死生契闊恩義乖音書隔
絕道路邈索居卧病東海土舊德棄捐徒歎作夢中
見公疑尚存雅度高風儼如昨公之神明在宇宙陟
降照臨焉可度或乘鸞鳳驂麒麟或奏韶夏陳羽籥
鈞天清都足豪俊講道論文恣歡譁應悲我輩混世
塵俛首顰眉語咿啞獨念靈攢客西土明詔未許歸
故宅昔蒙召見欲奏論造次自疑難感格 聖君需
澤覃萬方寧使遺骸葬夷貊子文無後善人懼馬遷
有書心事白所憂陋拙忝知已昭雪孤忠負前諾公
心豈不望後人入夢語子意甚確子兄文章極醇雅
典國製作名烜赫爲銘功行播遐邇可配史傳垂簡
策子將繼踵縮章綬便當任此千古託如吾自料乏
時才空言駭世徒宏廓水北山南結茅宇弟唱兄酬
老耕穫著書倘可寓王制未死尚期明聖學與子他
年擬見公公歸應化遼東鶴

寄脩德

平生識字不滿百浪竊聲名有慚色反觀身世每自
鄙何以使子心莫逆前月馳書許訪我恐我無錢厭
賓客惠書問疾繼踵來爲賀更生重悽惻我力不能

事耕稼性又不耐營官職承明辭歸茹藜糗侯封鼎
食誰願易今年瘡鬼忽侵凌寒熱交爭類勅敵垂頭
伏枕二十旬腰腹枵羸面如腊嗑乾恃粥不善飯下
牀須扶還按壁向來意氣隘九州頃步顛躓真可惜
所忻元兄督家政甌石無儲免憂戚抱書歌卧困即
眠見客暫起飢輒食萬事盡拋思慮表一身豈卹飢
寒迫古來賢豪例窮苦屠兒販豎千金殖皇天子奪
有深意衆生淺闇何由識君來不須念我貧厭飫仁
義非外得薄田近獲十斛麥炊之作糜可朝夕溪南
磐石廣數仞墻頭新筍高百尺竹間讀書石上卧青
雲爲蓋苔當席頗聞海上有巨鰲鼓舞洪濤氣腥黑
請君持竿亟一掣膾肉作脯如山積盡俾黔黎飽君
德與君大嚼醉千日免使窮愁惱胷臆

送劉士端歸括蒼

憶昔高皇定華夏海內遘屯龍戰野幃幄謀謨三
數公君家中丞最瀟洒軸轡十萬搗虛來帆檣蔽空
聲吼雷從容決策掃強寇手扶日月滄溟開盜犯洪
都突彭蠡砲石星流湖水沸御舟閣河諸將譁神箭
穿顛逆首斃是時中丞謀畧精指揮英傑江南平掀
髯撫掌談世事天子稱善群臣驚寰區混一定勲賞

鐵券金符頒土壤中承獨擅翊贊功賜號每爲諸伯
長青田宰木三十年高皇僊馭亦賓天國初故老
尚誰在幾人事業圖凌煙忽見聞孫三歎息秀目踈
髯遺像逼擬樹豐碑墓道邊欲請天朝重褒錫至尊
含咲問近臣先帝功臣今有孫胡為拂衣入山去盱
食未敢干君恩海內只今無盜賊幽州興兵惱邦國
廟堂謀議豈無人我懷中丞淚沾臆嗚呼志士古所
稀留侯武卿今是誰九原招公倘可作爲鮮四海蒼
生危

題王節婦

妾入君門知有夫夫雖不幸夫子孤人生必死死即
已大義一失將安圖爾有金如山我有心匪石頭髮
可斷頭可得以死報夫奚所惜幽哉猗蘭芳在彼澗
水湄荆棘非不繁永終保令姿千秋萬載苟可滅白
日成塵海成血

揚節婦

良人贈我明月珠永託團圓誓無違豈期生子髮未
髻竟以王事捐其軀妾身既作楊家婦撫此孤兒事
堅守明月之珠深自藏千金不落他人手青絲髮斷
今復長妾心直與珠爭光推門鬻市卒不售死將地

卷之二十四
下還阿郎玉堂學士文章伯爲發幽貞播金石千載
少似曹家妻凜凜遺風可相敵

題許節婦傳

渭水不可濁豈與常流俱節婦不可辱自與常婦殊
節婦之節良可書書出大手名斯垂嗚呼奇花異卉
人難植瑞麥嘉禾不可常種得

寫懷

子規聲裏吳蠶熟星繭纍纍照人目踏車已作春雷
鳴我獨無人冷機軸繭老蛾飛爭奈何愁端零亂如
絲多故人一去不復返徒有血淚如春波新婚已盟
未諧耦青鳥傳音在春後青春會少離別多心事殷
勤向誰剖君不見古井淵源百尺深欲汲未得勞人
心井深百尺君莫恨但恨繩索無千尋

聞鶻

不如歸去不如歸去一聲動我愁二聲傷我慮三聲
思逐白雲飛四聲夢繞荆花樹五聲落月照踈櫺想
見當年弄機杼六聲泣血濺花枝恐污堦前蘭茁紫
七八九聲不忍聞起坐無言淚如雨憶昔在家未遠
遊每聽鶻聲無點愁今日身在金陵上始信鶻聲能
白頭



原件短缺

P27

律詩

懿文皇太子輓詩十章

盛德聞中夏黎民望彼蒼少留臨宇宙未必媿成康
宗社千年恨山陵後世光神遊思下土經國意難忘
文華端國本潛澤被寰區雲繞星辰劍春回造化爐
變通周典禮寬太漢規模厭世嗟何早蒼生恨欲枯
監國裨皇政憂勞二十年龍樓方愛日鶴馭遽賓天
已失群生望空餘萬世傳長江一掬淚流恨繞虞淵
相宅圖方獻還宮疾遽侵鼎龜懸寶命笙鶴動哀音
誰紹三皇治徒傾四海心關中諸父老猶望翠華臨

謝蜀王撫問賜藥六首

有序

臣伏承睿恩撫問兼賜良藥及臯比講席拜
受之餘無任感荷敬次滕訓導所寄詩韻粗
述瞻仰之誠辭句蕪拙乞垂宥察而正教之
幸甚

超悟天人際從容禮法中豪端錦江水塵尾雪山風
善共東平樂才看異北空感恩慚獨厚箋疏許頻通
壤地三千里絃歌五十城廷多漢長者座有宋耆英
立事多師古行仁不近名願存無逸戒佇見治功成
聽政憂民切虛心待士虔典章皆有據談笑總堪傳

夜月初筵酒春風廣廈羶小臣懷德處每憶白駒篇
大名傳海宇盛德冠時人文字天垂象姿顏嶽降神
仁施邦域遠年與憲章新願沐恩波潤花溪理釣緡
賢王思賤士欲為制頽齡藥授還丹祕功存本草經
駐顏嚼鐻白鬪歲比冬青倘遂飛昇去長依傳說星
服猛本王政賜皮書閣中林泉眼如電文采座生風
似可講周易寧湏喚小空深思避賢者玄理未能通

應召赴京道上有作 三首

搖落秋冬際蒼茫郵越間青山欹枕過白鳥背人還
問俗鄉音異消愁酒價慳虛名果何物不使病夫閑

官程催歲暮百尺可停牽煙浦高低樹晚江來去船
青山過越少滄海帶吳偏所遇無親舊懷人興眇然
客路喜暄暖初冬天始寒近京風俗異逆浪水程艱
人語吳音雜漁歌楚調酸畏途非好友懷抱若為寬

病中述懷 二首

卧病知為國充湏謹未形盛強多過計安逸每傷生
燮理宜脩政醫治乃用兵但令元氣固四海樂昇平
故交憐抱病意厚數相過憂患人難免方書俗易訛
衛生功莫就醫國理如何但喜心無恙斯民疾更多
送盧信道漢中點兵

喜子東南秀照人眉宇清早探經濟學已負老成名
治世難忘武邊城要足兵關河雖跋涉歷覽快平生
題萬間室

一室纔函文何緣號萬間靜中存太極圖裏看人寰
舒卷心無外經綸意自閑誰能同此樂魚鳥亦歡顏

題曲徑

曲徑潛通市高墻遠背村醉眠忘作客靜讀懶開門
古學嗟中絕群經續已繁平生刪述意深恐負乾坤

次韻奉寄好義

四首

真齋至出見寄詩甚樹懸渴諷詠不能已因

借韻述懷邑中還同宿偶作一首今并錄上

初旭濕霜痕溪流緩復奔路因頻到熟心待舊交論
山勢隨村曲空煙接海知君多善教所至俗還敦

聞說幽居僻僊髮翠巖南陽坡饒美木曲澗會澄潭
問俗何方古歲名此地深期帶經往清夜擁爐譚

野性便時棄虛名耻世間目緣多慮暗志為好奇分
傍日翻書卷臨池寫練裙思君同雅興搔首誦停雲

混俗非真隱深居學避囂看雲山映竹坐石水通潮
道勝貧何病神完趣獨超遺經對千古意頗似聞韶

草沒堦前石雲連戶外山位居人下拙身在病中閑

出處多難事逢迎有瘦顏仰看雙白鶴暮向遠林還

歲暮寄王脩德先生二首

杪歲垂垂盡寒花悄悄繁律回春有信米動水生痕
樸學慚經濟窮居廢討論都將百年意一咲付乾坤
長嘯茅齋窄清談酒盞空天寒爐擅寵歲惡旣無功
計拙居鳩上身癯訝鶴同燈花咲愁絕故向夜窻紅

承宜隱友兄同還精舍賦短律五首為別

風檻臨溪敞幽人稱隱居高松偏宿鷺濁水最多魚
隣父邀嘗酒鄉豪咲著書時艱知己少來往莫教踈
携友踏溪沙同尋隱者家雨多知損麥土暖喜宜瓜

身願明時棄文慚世俗誇旅懷難一咲撥遣付流霞
於世吾何補論心子最知叫閣他日恨感事百年悲
地主能投轄天閑幸脫羈談經深夜坐涼月在清池
情深難遽別送遠却同歸衣濕洒塵雨路經垂釣磯
山童迎客慣國士似君稀且復聽雄辨前賢賴發微
千載康成學群賢惜異時典章秦火盡禮樂漢書疑
聚訟吾何敢承家子莫辭從來參筆削萬一補民彝

次韻荅錢文學二首

幽亭斜日在佳興與君同屐潤催詩雨衣涼醒酒風
鵝群穿草白蜂足帶花紅愁散身殊健全寬雲盞胸

卷之二十四
雲山留客住尊酒賴君同照影林端月清心水面風
醉書詩草里咲剪燭花紅不是聽雄辨難消磊砢胸

題畫二首

得意支郎畫分明是米家亂雲浮雜樹遠渡卧枯槎
白屋孤舟迥丹崖一徑斜何時共漁叟洞口訪桃花
曲折成千里雲山儼一鄉林疎茅屋見水落釣舟截
世路羊腸外僊家鳥道傍此身何處着箕穎意難忘

寄童伯禮二首

俗薄吾深厭家肥子孰過孝慈諸弟共才俊一門多
處世難同衆居鄉本貴和古來脩禮讓盜賊尚投戈

黍肉屢來饋寸心殊自憐傷廉增我過尚德貴君賢
握臂知身瘦捐書待病痊每懷徐孺子衰世道能全

催菊

蚤帶春泥種頻添沃壤培如何九日至不見一枝開
時過花何補天寒客懶來便須連夜發莫負掌中盃

代菊荅

生意本天得無人亦自芳但能娛晚節何必媚重陽
服食多延壽風霜獨擅場祗應夷皓輩心迹可相忘

過北山翁

避世慚無術忘年賴有翁山中九日後花下一尊同

江迥宜秋色林疎怯晚風放懷甘取醉舍此更誰從

送鄭履順二首

病卧思親友幾人能見過天寒念我至風義覺君多
取士周二物論才魯四科相期曾閱上歲月莫蹉跎
學是千秋事文非一藝卑古來傳道術誰免假言辭
魯史三王政周官百世規知君美才氣慎勿負深期

峨眉縣曉發次韻

渡水籃輿穩穿林草徑微勝遊方外得樂事世間稀
風過欹僧笠雲來掛道衣山靈應待久好去莫相違

謝群公送別

賤士何須送群公不世情聽鷄朝謁後並馬出郊行
心戀金門遠身依玉樹榮愁來今夜月兩地向誰明
道中遇盧先生

先生獨無慮作客竟忘歸謾把詩書閱寧知世事非
秋風吹落鴈江樹隱斜暉少立橋邊路相思恨久違

春和五首

幽人遊澗谷芳譽動京華暫食高山蕨終簪上苑花
醉歌辭激烈老態影欹斜願得萬間厦轉爲寒士家
山深諸葳殖海廣百川歸材蓄廊廟器文張錦繡機
魚龍將遠化鳧鶴漫齊飛爲愛賢名久人間萬事非

慨余徒就老羨子早馳名幽谷遷鶯語九臯孤鶴聲
課蒙聊給膳教子力勤耕身世相忘久山猿總不驚
念子身宜隱憂時志復存騰章吐語索句發奇言
燕雀爭栖鬧豺狼鬪食喧寧知陶靖節造意向田園
鄭生瑚璉器曾住此林丘死骨今埋土新阡誰樹楸
百年愁莫遣一夢樂誠優惟念雙親老無能爲爾謀
寄處州教授蘇平仲先生四首
懷舊輕千里無書遠七年論心思盡地會面極升天
名重連城價文雄萬斛泉何時絮卮酒紀德浦陽阡
舊習深知誤虛名久自羞故人猶比數文苑昔同遊

婺女遺言絕胡公學制優君施善教才俊滿南州
蘿山同業士存沒兩無聞未盡人間用寧脩地下文
劉郎應屏跡鄭谷自清芬搔首看征鴈天寒遠索群
昔過東陽縣知君近始來留詩徒屬和無計復邀回
賴有梁園客同傾杜酒盃死生星散後感舊復憐才

二十九日

三首

揮淚劬勞日持觴孝義門敢承千古託恐負二親恩
善頌慚諸彥傷懷望九原寂寥生意盡空愧此身存
野人哀感日天子戊辰年已負懸弧意空吟陟岵篇
病身難報國歎歲欲求田築室依先隴將心訴九泉

就木悲賢傑持家賴哲兄三人嗟葛並一世竟何成
毀壁千秋痛看雲此日情遙憐小兒子念我倚欄楹

遣病 十首

冬瘧春仍壯身羸氣覺虛
膈乾祇食粥眼眩廢觀書
行步兒童咲形容老病如
平生千古意獨在悶難舒
病痞當歲晏冬去病猶存
氣弱翻多汗心虛苦畏喧
此生應有命萬事可忘言
向晚移書卷微吟卧負暄
底用憂微疾人多悔久生
危機非畎畝高枕豈公卿
千古斯文託群經此日情
廢興天命在得酒且須傾
急雨張燈夜匡床伏枕時
食貧且客少身病願春遲

道豈斯文著才非聖世遺
用心耕鑿外榮辱竟何施
久病諸人問深居四壁牢
故交貽善藥姻婭饋醇醪
閑厭虛名絆貧知古道高
時來稍暄暖斟酌減綈袍
二月風猶勁寒生滄海波
呻吟知夜永羸憊損天和
行覺冬衣重眠妨夜食多
百年強壯日排悶付高歌
出戶迎人倦投床散帙迷
牽衣嗔穉子煮藥愧山妻
葛令尋勾漏梅生入會稽
病思方術士亦似咀雲泥
春風已兩月閉戶不相知
百舌強言事衆芳空滿枝
官途多世難卧病亦天時
應有簪纓者低頭羨我爲
飲酒留盃底攤書礙枕旁
人扶脩冠櫛客勸罷文章

穀雨催田父花時到海棠病夫渾不較流轉任春光
病久身渾憊醫疎術易窮囊空宜勿藥跡滯尚飄蓬
禮樂周秦後乾坤橐籥中數行憂國淚江海與俱東

童景純來二首

千古劬勞恨三冬瘡痍餘故交猶記憶尊酒問何如
拜倩人扶答文教子代書何時減藥餌一咲百憂除
歌枕雨聲歇竹間聞鳥鳴病惟愁是伴閑與懶相成
墮地驚茲日終天負所生一杯魚菽祭悲感淚縱橫

贈鮑民瞻

學道懶言文君文思不群雪消三峽水波漲一川雲

出處存文彖經綸在典墳莫名詞苑傳須立濟時勳

哭吳樗庵先生五十韻

夫子嗟淪喪鄉閭頃寂寥百年遺老盡一代典刑銷
在昔朝廷盛諸儒學業饒著書磨歲月抗論切雲霄
獨步才偏壯清時俗未澆翟門人競集鄭驛客嘗邀
冠蓋來千里牲牢具一朝柳營嘶騶裏茗椀捧妖嬈
家釀傳荷葉溪鮮貫柳條醉猶親簡策樂不爲簞瓢
晚節趨王命顰眉逐使軺將軍開幕府畫諾任賓僚
燕薊藩翰重兵戎節制遙宣威增國勢褫魄遜天驕
絕漠清烽火前驅奏鼓簫歸田心戀戀解組思飄飄

松菊猶堪理桑榆幸未彫散金思效廣擊壤願歌堯
紗帽長蒙首銀章懶束腰吟哦今李杜吐納古松喬
勝會無虛日清談或屢宵小心親里閤避咎狎漁樵
名美偏招謗年高未免謠鬪牛嗔孔雀孤鶴畏鷓鴣
媚灶慚何枉懷沙恨莫消事隨東逝水迹斷舊題橋
素櫬還家慘總麻聚哭噐可憐嬰世網本不負天朝
盛德知誰繼冤魂謾擬招園林昏黯淡風雨暮飄颻
致遠悲良驥搏空憶皂鷗聞喪皆頓足知己自垂髫
秀句時稱賞華筵必辱要吟成珠滿紙坐久斗回杓
造意魚依藻搜竒翠映茗劇談衾每共痛飲燭頻燒

髮爲工詩白心緣慮患焦豈知埋玉樹常想報瓊瑤
劍許何當掛琴存久不調已同麟斃魯空待鶴歸遼
官忍題朱旒家聞賣黑貂徑荒泥蚓出池廢雨蛙跳
隆替天難問災祥理匪昭聖賢從古歎憂患幾人超
女在難同蔡身危不類晁知音俄頃失抱疾轉無聊
蜀魄三更月胥江萬古潮誰能名季札應解訴臯陶
痛絕生芻莫哀傷壞木啣空齋暮聞笛揮淚向風飈

次危紀善五十韵倍成千字獻蜀王

有序

臣幸侍燕間叨陪論講於道德之奧雖未敢
窺然不可謂不知其一二近閱危紀善五十

韻排律詩因次其韻意有未盡輒復增加厥
數倍之成一千字上進蓋以紀事實而昭聖
世之盛美非欲效詞人墨客以靡麗為工也
伏惟賜覽觀焉

曆數歸真主皇威定八荒奉天頒正朔截海統封疆
建國遵姚姒貽謀鄙晉唐德星臨井絡全蜀仰賢王
白日開金殿紅雲綻繡裳輿圖文獻域城闕武擔陽
地秀多才彥田腴足稻粱十年藩輔重萬里幅員長
南土通滇楚東陲帶沔湘周封元過楚禹貢舊稱梁
盛德超中古高名冠四方擎天為柱石瑞世比鸞凰
禦衆樞機簡臨朝禮貌莊正冠居便座決事處齋房
實踐循規矩精思入混茫小臣名盡記直士諫無妨
該博尤知要英明匪過剛群書陪几席前哲儼羹牆
日爽宜方駕間平合侍傍事神孚盼嚮欽聖祝穹蒼
講學心無逸憂民意不忘陳經黃閣老問俗白髯郎
不洩親毛穎知微却杜康青雲隨鶴駕紫綬列鵷行
漢代規模大周官法制詳懿親思魯衛洪業重高光
師古人為鑑存心禮自防不知千乘貴惟恐一夫傷
餓殍虞填壑流民閔陷羗水糲贖賤穎玉粒飫飢腸
但欲調黎庶寧辭罄積倉分曹具饘粥隨處集羸羸

有嗶群聲沸相携蹇步蹠昏靡無橫天盜賊耻相攘
恩出蠲租令歡騰施藥坊嬰孩頽穀養齒酪賜棺藏
故老偏優禮先賢盡表章中興想劉葛佐運念關張
擬植千尋栢還栽八百桑廟堂新邃宇劍履列長廊
杜屋重輪奐花溪頓煇煌齊名圖至白接武配蘇黃
善政俱脩舉仁聲遠播揚校人馴狎虎膳宰縱河魴
要使天心順寧教物命戕至誠通造化惠澤及飛翔
淵懿真堪述謙恭莫肯當崇儒先五教建極重三綱
開館延耆艾隆師錫篚筐衣冠儀秩秩絃誦韻洋洋
執業諸生衆求書使者忙九流分插架萬卷載連櫳

樂善人心悅無爲國本強虛懷臻聖域騁步領文場
揮翰銀鈎活摛辭玉佩鏘昂彛皆國器蘭桂本天香
觀妙言逾富研精食靡遑日惟親孔孟性不惑姬姜
軫念窮邊地垂情健卒糧撫身無凍餒遇敵必騰驤
解語踈鸚鵡長鳴歎鷓鴣劬農興耒耜寬法絕桁楊
當代真希遇前王或未嘗泰山高莫並瀛海浩難航
麟趾耽經史龍衣佩瑤璜咲談溫玉色追琢燦金相
肅挹尊賢傳端居喚小璫已能通魯語正可齒虞庠
玉樹連枝秀瓊葩奕葉芳骨竒瞻日角派近識天潢
舉措存寬厚蒐羅必俊良聚賢頻設醴寶訓舊明堂

未學逢昭代平生服令望承顏初見日屈指九經霜
術類千金帚榮過七寶牀敢期蓮作炬每飲蔗爲漿
身賤思疑病言高點類狂汗顏趨紫闥馳夢落滄浪
心怯恩波闊人誇寵數彰賜衣頻跼踖前席屢徬徨
授簡安能賦開筵特命觴偶同華屋燕徒飽大官羊
雅句褒彌重微軀感莫量聯篇舒錦綺一字重琳琅
憶昔憂居聖陳情訴陟岡奎文昭孝行宰木發光芒
寵異兼存歿風聲別否臧望林掄杞梓占斗拔干將
知己恩偏渥希賢德甚涼何由酬覆載深幸覩顛昂
喜見皇家盛從知世運昌弓戈戢府庫道德固金湯
政教依仁宅詢謀遠智囊朝廷存鎮重夷狄敢飛揚
誠可回天地心能協雨暘群生蒙長養百谷屢豐穰
人傑生臯摯邦基過夏商九重延祚胤百世受禎祥
磐石安宗社山河拱帝鄉孤忠深佇望恭已贊吾皇
更無人日從蜀王登萬歲山

鰲首高臨紫極開五雲長日擁蓬萊高呼曾獻君王
壽人日今從帝子來寶仗鳴鞭金駮裏石牀御坐錦
莓苔才華愧匪朝陽鳳飛蓋華隆喜共陪

宿峰頂次濟定韻

層崖削壁跨千重坐鎮西南勢獨雄元氣昆侖磅礴

外祥光隱見有無中珠瓔寶佛留全相金碧樓臺倚
半空縱是蓬萊并弱水清虛難與此相同

登歸雲寺閣

棲身丹壑總忘歸水閣頻登趣不稀雨脚斜侵耕叟
笠苔花青匝定僧衣山餘積雪寒猶壯巖墮流星曉
更飛卜築何當居此地玉堂金馬任相違

木皮嶺

自慚非佛亦非僊也宿丹崖綠樹巔曉汲衣翻草頭
露午炊竈起木皮煙日離滄海三竿遠天厭烏紗五
尺連頓覺眼前無俗物片雲飛過鳥爭喧

山中對景書懷

烏靴脫却換青鞋踏徧名山愜素懷虎嘯石頭風萬
壑鶴眠松頂月千厓雲開面面峰如削谷轉行行樹
似排湖海故交零落盡煙霞清趣幾人偕

宿新津寶花寺

百丈岡頭佛寺開晚涼按轡陟崔嵬落花亂逐溪流
瀉歸鳥低衝馬箭回雲外老僧鋤筍蕨樹根童子掃
莓苔景清愛借禪房宿不爲參玄聽講來

送吳主簿

關西短簿衆稱賢太華峯前坐五年心爲嫉邪曾奏

事家因好客不留錢霜寒茅屋鷄聲蚤月落江城鴈
影翩此去京華遇鄉使好將嘉政萬人傳

次韻贈方真巖山人

到處清泉可洗心禪機一指用功深任教東住復西
住不改鄉音與梵音見客喜爲青眼顧能詩懶效白
頭吟近來識面峨眉上蘿月松雲得共尋

次韻兄調弟希政并柬鄭叔度二首

百年喬木陰當口五畝幽居水映茅好古喜尋遺老
問避喧懶與貴人交從兄受學漸蘇轍與弟分財咲
薛包孝友傳家得無愧聚蚊免使退之嘲

鄉間儒術許誰加弟唱兄酬興未賒經濟有心慚薄
德安居無事任貧家日高甕牖蜂穿紙潮落江汀鴈
聚沙却嘆離居趨侍日時來相對小燈花

挽徐節婦

大節寥寥不可聞晚從吾郡始知真百年禮樂無男
子一日干戈有婦人波冷曹娥沉白骨雨荒剡嶺洗
紅塵爭如烈焰三千丈高照青編萬古春

贈韓敏道先生赴召

先生樂道慕前人又被書徵覲紫宸詩卷已隨官棹
月布衣還染屬車塵文章共喜遭逢晚禮樂應知入

問頻登眺鳳臺多制作郵筒玆重寄河濱

次韻留別陳季明先生

二首

太丘美政漢稱賢高節英風四海傳
垂白雲孫今幾葉汗青甲子已千年
盍簪重見星垂象落筆猶驚地湧泉
耻以文章爲世用懶將辭色向人妍
每懷海上三秋別來借山中一榻眠
妙論久容親講席深盃相勸惜離筵
時清共喜閑身健情重翻令別意綿
他日朝廷訪遺老吹噓擬進白雲篇

絕句

枯木圖寄許士修

春到已多時幽禽尚未知上林無限好何事立枯枝

虎圖

踴躍谷生風崢嶸百獸中豈知王者瑞足不履生虫

題山水

二首

欲向匡廬隱出門知路難江山奇絕處多在畫圖看
離家今幾載衣袂染京塵不敢看圖畫青山恐咲人

題曹娥江

娥以孝而死江因娥得名至今潮上落猶帶哭爺聲

題竹月圖送太學生歸省

黃金臺上月照爾憶親情歸去供甘旨春林笋正生

黃全病中除夕

四首

數漏掩殘曆中宵氣候殊獨憐愁共病不與歲同除
三十知未老已難同少年功名謝時輩心事愧前賢
里巷占新歲皆云勝舊年幾回新歲過萬事只如前
良醫難治病學道不能行瘡疾何須患吾心病未輕

為向題畫

茅屋東嶼西嶼白雲前山後山為報溪頭流水落花
休出人間

牧牛圖

谷口驚湍雨歇柳陰芳草春還試問太平樂事夕陽

牛背青山

奉試靈芝甘露論

漢家圖治策賢良董子昌言日月光自咲腐儒千載
後却勞聖主試文章

書事

伏枕三旬不整冠夢魂時復對金鑿忽聞盛事披衣
坐今日朝廷立諫官

二月十四日書事

二首

斧袞臨軒几硯閑春風和氣滿龍顏細聽天語揮毫
久携得香煙兩袖還

風軟彤庭尚薄寒御爐香繞玉闌干黃門忽報文淵閣天子看書召講官

試院偶題 三首

柳影波光鎖院深一塵不到市聲沉多情惟有雙靈鵲時到庭前送好音
三代賓興法尚存每因取士嘆斯文近來眼病無聊甚豈復能空冀北群
橋門冠蓋藹如雲才氣爭先總出群自愧腐儒無筆藝強顏來此較斯文

次韻謝蜀王六首 有序

敬蒙睿恩賜以篇什誦味感愧次韻六首以謝

恩命許辭金殿直歸裝仍賜石渠書欲知懷德無窮意長望星辰想屬車
志是子淵方是廣才如魯點始爲狂自慚末學何爲者祇負恩言髻欲蒼

幸瞻天下難逢德又讀人間未見書魂夢何嘗遠禁闈深恩安敢忘巾車

德尊待士真忘勢位下憂民每悔狂明日岷峨應漸遠莫雲回首看青蒼

全德已看承道統雄才更復主詩盟欲知聖敬心無

息顧謐參前與倚衡

德勝東平弟與兄共誇樂國似蓬瀛近聞傳令安黎
庶歡動山南十萬兵

侍世子奉獻蜀王十首

有序

臣謬以踈庸獲侍世子殿下硯席竊覩岐
嶷之姿英偉之識度越于人萬萬誠宗社之
慶欲述鄙言陳民事人情物理之槩少效忠
懇以廣聰明恨未果爲先作絕句十首以進
伏惟益懋典學以副下情不勝至願
賢君德業本天成猶待脩心道益明喜見儲王親筆

硯更湏講學近儒臣

昧爽先求問寢衣三朝日日禮無遺古來世子能敦
孝惟有文王最可師

祖訓昭昭日月新由來治國本天倫令名要使傳千
載仁政湏教及萬民

炫日輝霞錦價高製成稱體小龍袍試看黼黻文章
美湏念蠶桑杼軸勞

金匙磔盃絳紗籠玉瑩珠圓顆顆同願采豳風歌七
月要知稼穡重三農

農事艱難古所憐一生幾度遇豐年若非聖世輕租

稅逐末何人肯力田

九經治國本脩身身正方能鑒別人辯佞要知駑異
驥任賢莫指玉爲珉

君王待士古來無令德高名滿八區濟美喜看賢世
子已能端拱禮諸儒

去歲開倉賑饑夫今年下令活無辜東平謾說能爲
善未識當時有此無

稅薄刑清見盛時民安田里俗熙熙欲求上古無爲
治仁孝君王自足師

謝蜀王賜果十首有序

屢承佳果之賜偶爾成句并述所見以寄下
情謹錄進上伏惟宥察

涪州丹荔擅時稱翠籠來庭色尚新獻罷未曾登玉
案先教頒賜與群臣

翠籠擎出殿門東受賜群臣喜色同却咲開元恩未
廣祇將異味悅深宮

尚食頻供素膳回金壺僊醞不曾開君王嗜道渾忘
味佳果何勞遠貢來

無才慚曳殿門裾玃味頻嘗玉饌餘解道側生風味
好惜非梁苑馬相如

九重勤儉恤民勞錫貢深思道路遙異味奇珍俱詔
罷皇明家法勝前朝
病身趨召歷千山又見江城荔子丹竊食無功心有
愧賜歸分與衆人看
園官愛果勝黃金一樹生成一樹心味美已知堪適
口當思培植用功深
利欲頽波挽不回幾人沉溺壞靈臺要明聖道無窮
意須仗賢王不世才
道術衰微幾百年陋儒無力愧皇天已看位是真王
貴須使心承往聖賢

新製蒲鞭賜理官丁寧用法效劉寬好生要使民無
犯示辱如寬也不難

無題 三首

宮臣傳教造安車駕出金門賜舊儒優老免親藩國
政入朝唯讀帝王書

山南桃李競春光食實年年在異鄉應被旁人暗相
咲閑官那得許多忙

伯兄海上思相見幼子山南憶別離兩地關心歸未
得夜看雲漢立多時

遠遶關庭 二首

戀闌思家兩繫情君王恩重屢留行欲知去國遲遲
意三日祇趨一日程

形如槁木榮枯泯心似虛舟去住忘底事別情猶不
奈只因懷德慕賢主

遊峨眉山紀行 十首

一鶴相隨復一瓢山巔水澁足逍遙祇因戀闌情無
限回首忘過萬里橋

西蜀雲山處處奇最奇人說在峨眉想應踏遍千崖
月露滴松梢鶴夢時

出郭涼風入抱清亂山遮馬似相迎寧知待召登瀛
客忽作看雲聽水行

玉憐塵土辱凡肌命入雲山茹紫芝只恐同袍不相
識誤猜禮佛到峨眉

客久賢主兩賜衣不知春到已春歸清朝試出都門
看留得殘紅一片飛

山頭月出天初露江面風生水欲波正是勝遊新得
意片雲相引入岷峨

朝辭宮闕莫田家江白山清兩岸沙卧犬不驚籬落
靜麥風簷底響繰車

孤舟湖口一名僧咫尺鄉山識未會今去峨眉同覽

勝躋扳湏上百千層
名山佳處孰同遊
白髮緇衣四五流
青眼古銘鄉士
彥燈前夜夜話
台州
學僊無骨佛無緣
甘着儒冠坐一氈
入社敢同陶靖
節不湏三咲
虎溪前
入山後覽定水仰山二上人并吳講師次予發
成都絕句韻因復次韻述事言懷
落日斜明掛樹瓢
下方城郭去人遙
青山過雨僧深
定門外雲封獨木橋
羽客禪僧也好竒
對人覓句幾攢眉
林端新月初高

夜葉底殘紅落盡時

倚澗人家近更清
吠風驚犬走還迎
衲衣鶴筆從章甫
落日看山一字行

山南夫子待多時
庭外松花落磴芝
夜半夢回聞鼓響
覺來顙泚冷沾眉

澗底白頭僧浣衣
雲間童子負薪歸
幽栖更羨投林鳥
半已尋巢半已飛

千尋古木已無柯
萬丈深淵不起波
此日勝遊他日記
落花時節到中峨

東海西頭是我家
門前花徑接鷗沙
三年別後一作却

徒多恨敢道詩書讀五車
山行十日只逢僧盡道蒙恩報未會共上峨眉望宮
關祥雲五色繞三層

奉詔名山作勝遊壯懷如水不停流今朝獨坐峨眉
頂一覽端能隘九州

榻借禪那豈夙緣坐來渾似舊家氈祇應心事慚蘇
晉不解長齋綉佛前

次韻寫懷送叔貞之成都十七首 有序

乙亥新春出城東偶作十七詩同遊諸友從
而和之因亦次韻以寫所懷會叔貞之成都

書以識別詩中所云司戶孫者即叔貞也

道濟群生心尚歎知周萬物禮逾勤能為世上難行
事始是人中寡過人

盛世豈無謀國者漢家長憶富民侯榮名史策尋常
事公論江河萬古流

漢高嫚士千餘載不見師臣與友臣解使時君謙德
重孔明而下兩三人

下士立身涇渭渾胸中耿耿是非存子雲美新最可
賤著作猶尊李仲元

密葉敲篁噪晚鴉荒村百里兩三家疲民采拾供租

稅猶恐傍人議權茶
 多才久要錢文學長日詩筒衮衮來俊思雪消三峽
 長好懷春到百花開中
 伯尚庭前傾竹葉用中宅畔看梅花天教二子相為
 樂來往風流也足誇
 每懷樗散鄭司戶喜看杞梓作孫枝氣清似得江山
 助才異休令匠石疑
 胡生挾策行千里足繭衣穿不肯回斯道要為終古
 計丈夫寧避俗人猜
 江山萬里無黃耳雨露三年憶紫荆日暮出門聞鴈
 過恐聽雲畔索群聲

一念無為付道耕
 體三代功名始可成

浩蕩乾坤爛熳春
 世縱有爭心豈解嗔

烏石岡頭白苧衣
 憶未必天心與我違

我與東風作主賓
 景也未輸他世上人

梅逕桃蹊遶草堂
 半依城市半通村
 春風一見如相

識莫逆於心兩不言
魚在深淵鳥在山
乾坤無物不相關
野亭日午支願
坐閑看雲天一鶴
遠
食罷移床坐小亭
細看群蟻奪餘腥
倦來莞爾成微笑
宇宙茫茫幾廢興
四
感舊九首
雄文不見林公輔
病眼荒荒何處開
將相亦輸天上
樂多情莫向世間來
盃酒論心有幾人
天台張毅舊相親
近來詩句多奇
語書比歲真更絕倫

精通八法揚文遇
暗誦五經陳用中
揮翰天庭應獨
步恐飢村巷欲成翁

翰苑暫歸盧太史
銓曹已失鄭郎中
名高金殿龍頭
選夢憶蒼山馬鬣封

林鄭爲文學我家
波瀾議論闊無涯
兩年不見何時
到望斷嶠江八月槎

博陵博士才華盛
漢上畸人道術卑
欲寄一書無鴈
過相期千占只心知
立言溫粹懷陳采
肆筆縱橫憶鮑岡
若使韓門加接
引未容籍湜獨升堂

王郎遠逐雲中戍許子俄爲地下郎重訪舊人尋舊
迹嶺雲溪月總堪傷
多病深知志術荒中年苦復厭文章欲圖天地相終
始肯與時人較短長

別母舅哭外舅鄭公

三首

昔奉安車共入關擬於此路復南還今朝獨向江東
去淚洒西風草樹斑

女甥携抱遠相從骨肉情深反負公南鄭江頭三尺
塚夕陽衰草萬山中

竹帛相期古道深結婚端不爲多金自慚非是奇男
子恐負侯高擇婿心

中秋對月

二首

雙槽鳴江水不波雲山無數拂船過夜深把酒問明
月月色與愁誰較多

南鄭荒墳草木寒東甌舊宅桂花丹九秋最好今宵
月又向孤舟獨自看

題漢中三寺佛放光

三寺神燈古有名我來惟見月華清非關佛日今消
歇應避文星不敢明

蜀相像

羽扇綸巾一卧龍警臣寶祚剪奸雄圖開八陣神機
外國定三分掌握中

買臣妻墓

青草池邊一故丘千年埋骨不埋羞丁寧囑付人間
婦自古糟糠合到頭

二喬觀書

深閨睡起讀兵書窈窕丰姿若个誰千古周南風化
本晚凉何不誦關雎

王節婦

兩月孤兒百里墳一燈風雨幾黃昏可憐玉帳豪華
客不識金沙節義門

鄭義門

丹詔旌門已拜嘉千年盛典實堪誇史臣何用春秋
筆天子親書孝義門

彭山道中

煙鳥歸林已夕陽野人相引度高岡馬頭一片青山
影經過緜衣似水涼

夜度桑洲驛

山路彎彎石甃平碧天凉露下三更無端一夜西風
惡吹着新愁上紫荆

客至
竹裏烹茶費屢呼
携壺沽酒遠村無
同食麥飯無難
色風槩知非淺丈夫

聞盧原質表兄廷試探花郎授編脩喜而寄之
奉天殿上榜初開共賀江南得秀才
好是青蘿居士
說近來文運屬天台

送義烏龔叔安給事歸省 二首

鷄舌同含侍紫宸
朝回東閣每相親
片帆忽逐西風
去鴛鴦行中少一人

繡湖煙雨正宜秋
之子還家喜得遊
中孝堂前舊明月
相隨重到鳳池頭

談詩 五首

舉世皆宗李杜詩
不知李杜更宗誰
能探風雅無窮
意始是乾坤絕妙詞

前宋文章配两周
盛時詩律亦無儔
今人未識崑崙
派却咲黃河是濁流

發揮道德乃成文
枚葉何曾離本根
末俗競工繁縟
體千秋精意與誰論

天曆諸公製作新
力排舊習祖唐人
粗豪未脫風沙
氣難詆熙豐作後塵

萬古乾坤此道存前無端緒後無垠手操北斗調元
氣散作桑麻雨露恩

覽陳先生見和諸詩戲題

孔璋揮翰檄曹公烈日秋霜格力雄白髮雲孫千載
後新詩尚可愈頭風

道者扇

競利爭名不暫休紛紛盡逐水東流道人心事如松
栢閱盡尋常草木秋

題山水隱者

先生六歲時作

棟宇參差逼翠微路通猶恐世人知等閑識得東風

面卧看白雲初起時

題山水

霜落江南木葉丹滔天波浪一舟還何人得似林中
叟目送浮雲過遠山

脩德惠枯木圖次韻

有序

脩德先生寄惠枯木小幅并以詩留別病中

不能追從謹次韻奉答

遠別出門愁見難燕山越水路盤盤將心付與天邊

月兩地清宵一樣看

月明樹影落晴波寫寄山房古意多已分此身同槁

木歲寒相對老巖阿
百年禮樂愧前賢
瀟洛微言久不傳
待子歸來同講
習細炊麥飯飲寒泉
至道無聞昧力行
神交千載獨周程
直教俯仰渾無
愧始是堂堂世上英

見梅

寒梅凍後放幽姿
何事今年花較遲
昨日途中春意到
溪頭纔見兩三枝

畫梅

微雪初消月半池
籬邊遙見兩三枝
清香傳得天心在
未許尋常草木知

竹

不禁俗物敗人意
忽見幽篁眼爲明
記得舊遊天上夢
連昌宮外聽秋聲

題東坡畫竹

內翰何年寫畫圖
眼中驚見鳳毛孤
一枝潤帶江南雨
遂使眉山草木枯

斑竹圖

湘君泣盡淚痕乾
翠袖蕭蕭倚暮寒
却憶洞庭爲客處
滿湖風月泛舟看

墨菊二首

解印歸來鬢已斑故園松菊可怡顏祇緣三徑荒涼
久特寫秋花仔細看

分根昔日向東籬種近羲之洗硯池幾度偶澆池上
水花開朵朵墨淋漓

題菊

順流舟楫日邊回古木軒窗不際開萬里西風數行
鴈送將秋色過江來

馬

一日曾騎越與燕鼓車隨後意茫然圉人何必相羈
絆亦未乘龍去上天

聞燕

曉意驚回燕語巢
日待漏金門鼓尚敲

百雀圖

曲巷高簷避網羅朝來飽啄隴頭禾但令四海長豐
稔不厭人間鼠雀多

羲之籠鵝圖

內史清真江海情每將高詛動朝廷平生却被能書
誤更為鵝群寫道經

詩更荷花渚禽

絕世丰姿不受塵丹霞為質玉為神渚禽莫怪開時

晚一洗尋常草木春

念不鸚鵡

幽禽兀自囀佳音玉立雕籠萬里心只為從前解言

語半生不得在山林

立春偶題二首

萬事悠悠白髮生強顏閱盡靜中聲効忠無計歸無

路深媿淵明與孔明

百念蹉跎總未成世途深恐誤平生中宵擁被依墻

坐默數隣鷄報五更

臨海縣知縣黃誥

黃巖縣知縣張師善

台州府儒學教授尚芳

訓導李深

黃巖縣儒學教諭文程

府學生陳縝 葉琰 王梅齡

臨海縣學生李臨 戴濟之

黃巖縣學生孫思光 牟汝鈞 校對

遜志齋集卷之二十四終

遜志齋集附錄

中順大夫浙江按察司副使奉勅提督學校雲間范惟一編輯

奉政大夫浙江按察司僉事奉勅整飭兵備南昌唐堯臣校訂

中順大夫浙江台州府知府事刑部郎中東吳王可大校刊

蜀王賜方漢中書 二首

公西州之冠冕有識者無不心悅誠服而新學晚生亦有所依歸也余一日不見有如三秋况在遠道乎先民有言能自得師者王又曰務學不如務求師良有以哉

予以耿躬藩衛宗社之重亦必慎柬賢良以備顧問

爾懿文清節有東漢之風尚志立言爲當代之重秘
閣閱書燕閒賜對經帷進讀道德坐論矧乃郡庠之
責學課之繁別旣數月良非得已忠言嘉謀予所饑
渴竭乃心力副予眷待遣書指不多及

公西蜀王送希直先生還漢中詩

崑山峨峨江水泱泱我疆我理俾民以康
靡言匪衣靡善匪得閱士孔多我敬希直
謙以自牧卑以自持雍容儒雅鸞鳳之儀
有學有識乃作乃述追之琢之金玉之質
侍我經筵不倦以勤非德不言非道不陳

軾思其歸義不可奪采采者芹徇教如渴
爰抹其馬爰振其衣拜手稽首載辭而歸
昔之來也春日遲遲今之歸也涼風淒淒
悠悠我心念子良苦爰命辭臣飲餞江許
王道如砥旣歌且詠八月初吉抵于南鄭
沔彼江漢亦合而流瞻彼岷峨鬱其相繆
心之知矣臨別繾綣子如我思道豈云遠
歲行在子文闈秋開較藝至公逢子西來

蜀王賜方教授詩

三首

伊昔開東閣相看眼獨青文章奏金石衿佩覩儀刑

應世遊三輔焉能困一經前星垂炳耀染翰侍彤庭
聞說眼空天下士只疑身是洛陽人少年有學談仁
義高論無慚問鬼神九載之官看教育萬言詣闕聽
敷陳曳裾已在長沙日知己相逢此志信
四十雖聞不動心平生富貴豈能淫屢蒙論薦來天
祿自負文章入翰林養望也須添白髮觀光仍遣教
青衿河間好古嗟予慕多士從遊愛子深

蜀王送胡志高赴漢中兼東方希直

二首

趣裝何處去驅車赴漢中欣然遊大郡况復依方公
問學日益博道德日益隆丈夫志遠大那肯局樊籠
他年居館閣步武接夔龍

胡子蜀中士受公知更深不憚三巴路欲成仁者心
伊昔韓門士籍湜蒙賞音最哉今胡子顛無媿鄭林

鄭公智
林良顯

蜀王讀基命錄

武皇稱汲黯近古社稷臣卓乎天地間百世有餘芬
宋公廊廟姿志慮殊精純由來慕前列願學在斯人
雖處江湖遠擬欲踐臣鄰苟非堯舜道肯向黼衣陳
嘗咲賈大傅前席對鬼神著述累萬言所言皆歸仁
爲君觀此書四海屬經綸爲臣觀此書有術能致君

聖賢友多聞我亦忝嘉賓持此以贈我讀之至夜分
撫卷再三歎良可媿典墳

送方生還天台詩

有序

金華宋潛溪濂

古者重德教非惟子弟之求師而爲師者得
一英才而訓飭之未嘗不喜動顏色此無它
天理民彝之不能自己也予以一日之長來
受經者每有其人今皆散落四方忝稷雖荒
芘不如稊稗之有秋者多矣晚得天台方生
希直其爲人也凝重而不遷於物穎銳有以
燭諸理間發爲文如水湧而山出喧啾百鳥

中見此孤鳳凰云胡不喜越一年別去感慨
今昔又云何弗思退朝之暇懸燈默坐因發
於聲詩一十四章以送之末章用來字者冀
負笈重來以迄於有成也詩曰

北風何透迤雪花大於手之子有遠役忍勸尊中酒
念子初來時才思若繭絲抽之已見緒染就五色衣
被之行儒林孰不生豔慕蹉蹉媚學徒一步一回顧
余生老且至秋髮垂兩肩得之喜欲舞如獲寶珞然
素編耽清書青燈坐深夜探玄欲忘寢薦味如啖蔗
一朝別我去何以釋離憂不禁秦淮水流于江上舟

但願逆風起吹舟不得往共穿鍾阜雲時看白石長
風本無情物豈能知我心事既不得諧贈言如贈金
須知九仞山功或少一簣學貴隨日新慎勿中道廢
群經耿明訓白日麗青天苟徒溺文辭螢燭欲爭妍
姬孔亦何人顏面了不異肯墮盆盎中當作瑚璉器
不見金谷園瓊芳委塵沙泰山有喬松老榦凌蒼霞
四海皆兄弟知己獨難遇伯樂倘不逢鹽車厄騏驥
明年二三月羅山花正開登高日盼望遲子能重來
洪武九年冬十一月書于蘿山石室精舍

送希直歸寧海五十四韻

有引

潛溪

洪武丙辰予官禁林寧海方生希直以文爲
贊一覽輒竒之館賓左右與其譚經歷三時
乃去明年丁巳予蒙恩謝事還浦陽生復執
經來侍喜動于中凡理學淵源之統人物絕
續之紀盛衰幾微之載名物度數之變無不
肆言之離析於一絲而會歸於大通生精敏
絕倫每粗發其端即能逆推而底于極本末
兼舉細大弗遺見於論著文義森蔚千變萬
態不主故常而辭意濯然常新衮衮滔滔未
始有竭也細占其進脩之功日有異而月不

同僅越四春秋而已英發光著如斯使後四
春秋則其所至又不知爲何如以近代言之
歐陽少師蘇長公輩姑置未論自餘諸子與
之角逐於文藝之場不識孰爲後孰爲先也
今爲此說人必疑予之過情後二十餘年當
信其爲知言而許生者非過也雖然予之所
許生者寧獨文哉庚申之秋生以不見大母
者久將歸省焉予深惜其去爲賦是詩旣揚
其素有之善而復勗以遠大之業云詩曰
昔在辭垣時英才常駿奔水碧與金膏價重駭見聞

終然無根蒂歛散空中雲方生海來上玉立而春溫
袖携繡繡書面帶黼黻文揖遜入禮域陳義凌秋旻
同食大倉粟共勘典與墳潛深索幽邃穹高攀嶙峋
踏雪忽言別涉險航江津梅花似相憐沿途憫孤貧
湛恩來九天憫我髮如銀特勅還故山許與煙霞親
生聞抱經來處此寂寞瀆瀆蒼扣無始溟滓窮無垠
宇宙所管攝載籍所敷陳終始鈎鉗之若大樂建鈞
律呂按高下官商肅君臣鬯和免漉漉疊奏歸繹純
桑濮喚麾斥淫哇竟何存黃鍾壓瓦缶庭燎滅鬼燐
似茲稽古力可敵戡定勛濡毫寫雄顛勢足移峨岷

漏泄渾沌竅出入造化神變幻波起伏清溫玉璠玕
盡抽神奇秘不墮臭腐塵所以日出之愈見光景新
山鬼當洒泣湘靈且逡巡振古著作家後先各繽紛
豈知萬毛牛難媿一角麟古今二千載有如星在晨
豈意瓦礫中見此席上珍予生髮未燥立言鄙河汾
結交一世士暮齒越七旬妍媸與苦良入目無留痕
自非病狂藥顛倒甲與謹寧因一學徒諛辭浪云云
大言心不忤祗爲所見親公省行期序飲松竹根
咲摘黃金花起泛青蘋少兩耳熱劇論如抽繆
寧無贈別言有志須王無用世毋徒滯彌文

文繁必喪質適中迺彬彬有虞號多士九官展經綸
惟時亮天工外夷悉來賓不聞有著書鼓蕩摩乾坤
生乃周容刀生乃魯璣璠道真器乃貴奚須用空言
孳孳務踐形勿負七尺身敬義以爲衣忠信以爲冠
慈仁以爲佩廉知以爲擊特立睨千古萬象昭無昏
此意竟誰知爲爾言諄諄毋徒謂強聒一一宜書紳
洪武十三年庚申秋九月吉日

先生與伯欽書云太史示予此詩未嘗以示人蓋
以其知者少故也今特錄寄吾兄前輩勉後學倦
倦之意不特在乎文辭而已望相與勉之

跋太史公送方希直還詩
臨海林佑公輔
天下之士不能皆賢拔其充賢者而訓迪播揚之則
天下之未賢者亦將觀感而興起矣此善教之道也
孔子論仁論學之際一則曰顏子二則曰顏子而三
子之徒亦自以爲不及日夜勸勉求其所以爲顏子
者終聖人之世雖庸才末學聞風而起者皆有所成
非教者約而所成者博哉苟不擇賢愚槩而進之非
惟彼未有所悟而我之教無迺屑屑矣乎當今之世
去聖人已遠執聖人之道以戶牖天下者太史公一
人而已天下之士登公門者奚翅千數而公許與之
間特於希直深有望焉觀所贈詩拳拳之意蓋可見
矣雖然使天下之士其立心其操行其爲文辭誠如
希直者公之心也幸而僅有焉又烏得不深望哉又
烏知所望於希直者不爲天下學者之所望哉吾知
此詩之作不特於希直見之

又

臨海葉見泰夷仲

見泰視宋太史公以年則父兄也以道則師也少爲
學子時常思從公遊而不可得洪武初自安南還始
拜公京師公一見即呼爲忘年友而不屑以師父兄
自居頗疑公有所惜旣而侍公者數月辨論規誨未

嘗不為予盡乃益服公學鉅德溥信乎其為一代偉人而非叢爾小子之所能測也其後為廩祿所縻摯摯然往復南北雖或間至京師一再見公而不得久嗚呼公今不可作矣閱其遺稿輒潸然出涕公高第方君希直性孝友為文章雄邁醇深登公門者皆莫能與之齒公特鍾愛之雖親子姪弗及也在金華時嘗辭歸省公作詩二百餘言送之所以期望之甚重今年冬予與希直同徵赴京師希直於舟中出以見示相與收淚讀之予且衰愧無以答公之知希直方富於齒尚益自力以求副詩中之所稱也夫洪武十

五年長至日

木榮又

濬事愚菴先生時希直年纔十四五操筆綴文固已不凡後希直從先生守濟寧由京師還值予武林出示今太史公所贈詩觀其規勉屬望之厚情詞藹然濬疑天下不能文之士莫不以得出太史公之門為幸如希直者宜非一人而希直以童冠之年廁於其間獨何道以致此哉去年冬太史公來朝往拜之頃復得與希直晤叙且得盡見其所謂遜志齋稿文氣渾成識見卓邁動以聖賢自許其身不但言詞之古而

已然後知希直之致此者有在也雖然古學不明久矣世之人以時代觀人而不知今之可以爲古故特達抱負之士恒見累于多口是雖習俗與時移易抑亦吾道未有以信之爾希直尚益勉循古道興復古學不負太史公屬望規勉之意使先生之學不被于世斯爲善爲人後矣惟希直念之

染說

金華蘇伯衡平仲

凡染象天象地象東方象南方象西方象北方象草木象翟象雀以爲色取蜃取梔取藍取茅蒐取棠盧取豕首取象斗取丹秫取沔水取欄之灰以爲材熾之漚之暴之宿之滯之沃之塗之揮之漬之以爲法一入再入三入五入七入以爲候天下染工一也於此有布帛焉衆染工染之其材之分齊同其法之節制同其候之多寡同其色之淺深明暗枯澤美惡則不同其深而明澤而美者必其工之善者也其淺而暗枯而惡者必其工之不善者也蓋天下之技莫不有妙焉染之妙得之心而後色之妙應於手染至于妙則色不可勝用矣夫安得不使人接于目而愛翫之乎此惟善工者能之非不善工可能也夫工於染者之所染與不工於染者之所染其色固有間矣然

雖工者所染之布帛與天地四方草木翟雀其色則
又有間矣無他天地四方草木翟雀之色二氣之精
華天之所生也天下之至色也布帛之色假乎物采
人之所爲也非天下之至色也學士大夫之於文亦
然經之以杼軸緯之以情思發之以議論鼓之以氣
勢和之以節奏人之所同也出于口而書于紙而巧
拙見焉巧者有見于中而能使了然於口與手猶染
工之工於染也拙者中雖有見而辭則不能達猶不
善工之不工於染也天下之技莫不有妙焉而況於
文乎不得其妙未有能入其室者也是故三代以來
文者至多尚論臻其妙者春秋則左丘明戰國則荀
况莊周韓非秦則李斯漢則司馬遷賈誼董仲舒班
固劉向揚雄唐則韓愈柳宗元李翱宋則歐陽脩王
安石曾鞏及吾祖老泉東坡頴濱上下數千百年間
不過二十人爾豈非其妙難臻故其人難得歟雖然
之二十人者之於文也誠至于妙矣其視六經豈不
有徑庭也哉六經者聖人道德之所著非有意於爲
文天下之至文也猶天地四方草木翟雀之爲色也
左丘明之徒道德不至而其意皆存於爲文非天下
之至文也猶布帛之爲色也學者知辭氣非六經不

是以言文玄非天黃非地青非東方赤非南方白非
西方黑非北方夏非翟緞非雀紅綠非草木不足以
言色可不汲汲於道德而惟文辭之孜孜乎天台方
希直從太史宋公學爲文章其年甚少而其文甚工
不惟同門之士未有及之者自朝縉紳以至四方之
老成凡與宋公友者無不推許之以爲不可及余每
過宋公退即希直讀其所爲文未嘗不擊節而歎其
有得於文之妙也今希直將歸其鄉大肆其力於文
故因以此勉焉余自蚤歲徒盡心於文章垂五十而
迄無成不知自勉乃欲勉希直寧不知愧然希直得
余說而及時以道德自任則又何至予哉此予之所
以致愛助於希直也洪武十九年秋八月望日

古詩贈希直

葉見泰

吾友方濟寧其人世希生有如炎燉之雪暗天之星
平生特立不徇俗窮年矻矻惟究心乎義文周孔之
遺經一旦起作郡卓然爲群黎之怙恃列牧之儀刑
九原長往不可作使人思之泫然雙涕零我言濟寧
今不死濟寧有子字希直外焉才華已絕世內焉持
敬恒惺惺往年我謁宋太史見之坐右愛其風神秀
發目光如月雙眉青太史文章擅中土東播踰若木

西流入麓冷每稱希直稟間氣旁馳餘子猶以清渭
臨濁涇太史猶巨鐘而我猶寸莛我誦蕪陋辭一一
爲我側耳聽只今遠行不可覲送入樊籠仍剪翎我
歸已五載俛首類拘囚每一念疇昔中心若生螟今
年希直忽相過使我洒淚如醉醒握手塵市中頽影
兩蛉蟬雄文細字塞巨帙咄哉著述能爾馨振袂快
讀不可了雅辭宏論開心局其顯遏雲漢其幽通窈
冥瞻如戈甲積晉庫竒如盤鼎鑄商銘麗如勾芒青
春布花卉壯如隆豐白日驅雷霆千流萬派怒奔放
終然帖帖趨東溟頽我歛退餘守口動如瓶今日得
子文耽誦不暫停有如赤日途解渴得楚萍又如藜
藿腸忽咀五侯鯖瑣瑣彼何人廼工月露形劃然周
廷覩巨燎光影不復窺微螢嗟哉希直執經太史門
聞禮濟寧庭以文比行行益峻持以用世不啻如養
生之穀粟濟疾之參苓胡乃僻處東海裔坐閱晦朔
彫堯奠我欲其爲不朽計鉉鐸淬礪重發硯至音詎
能秘錫鸞谷和鈴直頊上追虞書媿周雅豈肯下比
秦誓方魯駟于以作春秋之羽翼爲禮樂之藩屏嗟
哉載道噐孰謂在世猶芻靈上帝閱世憫斯文寧復
下取勅六丁水爲江漢星作斗鑄之金石垂千齡洪

武十年夏五月吉日

送希直遊金華

同邑許繼士脩

良會古所惜光景不可留故人今有行出門復悠悠
晨鷄號遠陌行色滿道周惻愴意莫宣慷慨意難酬
願言力古訓所貴德業優千里從明師豈徒事遠遊
川原渺何極仰止在山丘余生學苦晚賢哲忽我尤
頽乏馳騁力重增離別憂遙遙金華道逸駕邈難儔
瞻望兩相失從君去無由願爲東南風吹上八詠樓
願爲雲端月照彼雙溪流君情諒不違我心復何求

答希直

許繼

婺嶺隱天末遙思正屬君慰情來遠札動目有新文
逸驥莫並駕離鴻常念群山空歲華晚舊話幾時聞

送希直應聘赴京

許繼

陋學窺千載古今極寥寥奇才不世出先哲何其遙
方子間氣英孤鳳翔九霄經史歛胸臆早歲能充饒
深造入玄閔精研味腴膏發爲五色文光燄萬丈高
吐辭信雄筆江河勢滔滔聞者但縮喙白首慚俊髦
受知潛溪翁恩義猶同袍顧託有深意揚言豈虛褒
聲價凌海嶽山澤焉久遨神珠隱自現寶玉終難韜
中使隆優禮特起推賢豪天衢麗雲日盛際宜有遭

紀載小班馬明良慕夔臯徽猷諒已著榮名非所徼
同鄉託交誼眷戀豈一朝因依附勁翮愧我腹背毛
會難思少留去馬疾若飈情至不能別病懷空鬱陶

聞希直自京還

許繼

玉音初捧已殊倫天意深嘉得異人衆謂歐蘇才復
出我知孔孟道當伸賜歸使就林泉養期用留爲瑞
世珠一旦已成千載遇高風矯首在清旻

寄方正學內翰

樂平程仕簡

三十年前下董帷姓名早見註黃扉古今文字非無
託天地精華信有歸金匱入編嚴斧鉞紫泥承詔落
珠璣斯文盛代惟公輩林下何曾有布衣

大正學齋記

金華王紳仲縉

漢中府教授天台方公希直備神明之資負正大之
學慨然有志於聖賢者也蜀王殿下素加禮敬間嘗
聘置右右以咨諏正道公見必以仁義道德之言陳
於前王方大肆力於緝熙之學日以誠意正心躬脩
體驗爲務與公論辨若律呂之諧肯綮之中無不脗
合王愈加歛容納之與臣下言必曰方公今之賢者
也遂賜名其讀書之齋曰正學期其底聖賢也公退
以告于紳紳聞三代之隆大道昭著風俗淳厚人倫

明于上教化行於下故人之學焉者多出於正周衰
列國分爭人尚詭異各自知能自立門戶而異端之
術競起矣若楊墨之爲我兼愛老聃莊列之虛無張
儀蘇秦之縱橫韓非申不害之刑名管仲晏嬰之事
功有不能枚舉者逮至漢唐世愈降而道愈漓著書
動以百計其爲說必曰我著書所以明斯道也而道
卒不加明我立言所以開人心也而人心終不加古
非徒無益於人其所以壅塞正途聾盲耳目者爲甚
大天下之士莫不隨波逐流而相上下其於聖賢之
道遂若岐逕之異趨矣比之三代之學其邪正爲何

如尚幸間有豪傑之士出於其間足以回人心破
邪說挽頽波而振餘風然亦不能多見若漢之董仲
舒其言明白坦易爲得聖賢之心唐之韓愈卓乎特
立於百世之下皆間世之奇才也至宋周茂叔以洒
落之懷得理奧於默契心融之妙及其門者若二程
子之主敬行恕窮神知化而道益宏遠矣其後新安
朱子出又能推明周程之旨而集群賢之大成於是
世之先後雖不同要皆羽翼斯道而所學純乎其正
者也故自三代之下論者莫先於宋有元之時若許
衡氏若吳澂氏若許謙氏輩彬彬和附于下者蓋莫

非朱子之傳嗚呼上下千數百年求其人僅僅如此而邪說之惑人反有過之則夫凌高駕虛勵志鼓勇而跌足於異途者可勝道哉此志士仁人所以扼腕而深悲也今公才足以振俗德足以服人生逢聖明之世而又遭遇賢王之眷顧則所以追諸子而邇三代者公其可無意乎紳識志卑淺於公之學無能爲役幸嘗辱知於公最久故敢竊公之餘論以繹睿念之萬一苟以爲然則繼今以往益圖執鞭以爲御焉

谷方希直先生書

紳向時嘗立於道邊見有行者揖群兒而問曰某將

往于某敢問何之群兒指曰當從此往有頃行者悔曰群兒之言不足信乃更揖於父老父老曰當從彼往行者從父老言果得周道以此自懲學問之道果何異哉自孔孟沒後道術分裂百家並起各自以所見爲言上下數千年其人不可勝數大抵皆得其一而遺其二剽其末而失其本者也甚至敗道傷化流毒遺害者有之况至於今風俗愈漓教化愈敝則其言又豈不甚乎此豪傑之士所不忍見而自默稍有志者當慎擇而聽信之也紳質性愚陋固不能立言以攻之然切欲慎擇而聽信四五年來問道之心甚

切群兒之言喧囂闐闐于耳者亦不爲不多及求如父老之言惟執事也故紳於執事之言每心融神會旨解意通獨恨力不足耳苟其可強雖水火在前弗顧也今執事乃惠書以紳能聽執事之言爲獎嗚呼以善道告人而從之入之情也又豈紳有過人也哉雖然執事所謂知言難遇發口祇覺無味故默默自解此則紳之所惑者也自昔聖賢之生豈必逢聖賢而後言皆俯躬曲就喋喋而誨之惟恐其道不明也孔子嘗環轍於魯衛陳宋之邦至老不倦後雖有無言之歎然亦發憤之辭也孟子奔走於宋梁之國汲汲以仁義闢邪說時人不察或譏其好辨而孟子不沮觀其所爲可槩見矣今執事備精誠之才蓄純明之德日以立言明道爲已任而期底乎聖賢之域庶日談論於衆人之中是者進之非者斥之使開其心化其質是其宜也胡爲默默以自解無乃與孔孟之心異乎雖然紳之愚世所不取而執事且教之又安知執事之言非孔孟之意乎徒以紳受執事之知而不以是爲復是負執事之心也又豈紳之心哉

上侯城先生書

先生又嘗號侯城生

王紳

君子負天下重望者必有副之之道也然言其衆非

一士安得人人而誨之哉言其久非一時安得日日而語之哉古之立言著書者正以此也紳切見執事以英妙之年早屬天下之重望然而副之者非無意也第恐有所未盡焉姑以近日目所及者言之自卯而入見于王口談堯舜周孔之道日閱書詩六藝之文及申而出接見賓客學徒者十數輩扣之以律而應之以律倡之以呂而和之以呂無不各中其節其用心亦云至矣而其勞亦且甚矣然復以爲言者蓋以陳于王前者雖其盛而尋丈之外人不得而與聞也接于往來者雖甚美而閭巷之間人不得而共知

也是則執事窮神憊力於一日之中而所及者止此則又何以慰遐陬僻壤之望哉此紳之所以拳拳望執事立言著書以明道也且道之不明亦已久矣自孔子沒異端並起至孟子麾而斥之其言見於七篇之書其書雖爲門弟子之所記述然莫非其精神心術之所萃後平萬世斯道藉之爲保障生民倚之爲粟帛其功不在禹下者豈止及數人而利一時哉其後若荀卿若司馬遷若劉向揚雄班固輩莫不各以著書爲事而其所至亦各不同惟韓愈獨不喜著書故張籍切切爲言愈請待五六十然後爲之紳未嘗

不慊于懷以爲著書必待五六十且萬一天不假年
則賈生之策不及陳而文中子之中說不及著也切
意愈之卓立豪傑邁于近世其書之不著固不足爲
其重輕第人之仰望者不無觖意焉今執事之才之
美固將轅馬劉駕揚班而底孟荀也天下之所仰望
者豈外此哉執事苟不亦有以副之吾恐望之弗得
必繼之以怨怨之不止必隨之以詆且毀也或者又
謂凡著書必其道不行于時故托於書以自見耳今
侯城蘊才蓄德筮仕云初方將駸駸見用以究其志
奚以空言爲事乎曷思大上有立德其次有立功其
必有立言其並列非一日矣孔子亦曰有德者必有
言未聞立德者棄事功而建勲業者遂忘言也周公
其德大聖也其位冢宰而攝政也其言散見於詩書
周禮也迄今未有病之者而著書豈足以病執事哉
今執事之德厚矣言之見於文章日用者大而至於
苟遂因而筆之於書則雖安處一室終日如愚而遠
近之人均受其惠矣何必窮年竟月披寒冒暑奔頓
於道途以副人人之望而卒不能周其望乎惟執事
其納而圖之

上侯城先生第二書

王紳

向者不揣愚惑輒獻警言於左右蓋祈執事立言著書以振天下之聾盲情激于中不覺翫縷執事以爲然耶談笑納之俾副其望可也以爲非耶訶叱而麾斥之不爲過也今旣不遂其請願乃賜答以千數百言若有所論辨者尤見執事之德之弘不以言之不善而遺之獨固守其謹攝而不變又且道之使盡其言者是豈紳之所敢望哉然而有不可已於言者故不得不終其說也執事懲揚雄王通之徒未明道而著書爲無益於世遂欲躬顏子黃憲之行俾默默無片簡之可傳而後已足猶懲人之病風而惡出畏人之溺水而却游也不其矯之太深而過情也哉且天之生聖人也豈特獨厚其身邪亦將用其有餘以備其不足爾觀乎堯舜禹臯陶益之典謨高宗湯武成康伊傅周召之訓誥若孔子之所以刪述曾子思孟之所以繼繩其大要皆所以成已而成物也以是聖人雖不世出而斯道不終泯者以有斯文之足徵也今執事又謂斯道近世大儒剖析刮磨具已明白縱著書不能加於孔孟故辭讓不爲是尤不可也且所謂成已成物之道六經已具載矣孔子無言可也而猶不忘於弟子之問答孔子大聖也其言該博無遺

宜若無以加矣而曾子猶用心於大學子思親承曾子之授且聖人之澤未遠可以忘言矣亦汲汲於中庸孟子時異端雖起苟舉聖人之說而闢之亦可矣乃反覆乎七篇之言至周元公道絕千數百載文獻昭昭尚在也亦必以心得之妙筆而爲書其後若二程子若張子若朱子若呂子輩莫不各以著書爲事其餘紛然作者不暇論彼諸聖賢者豈不知天下之道一揆也聖賢之至不可等也然且鯁鯁焉若此者所謂畏天命而悲人窮至仁之心也今執事言行皆取則於賢哲頌獨於斯而避之此紳之所以未曉也

且執事之所以脩于己者美矣而士之所以望於執事者亦至矣正宜寢不安席食不下咽拳拳夜以繼日而圖副人之望尚何暇恬居安處而俯與紳論辨去取乎哉惟執事深思而毋忽

與童景庸書

王稔叔豐

仲緝先子

王稔再拜書奉景庸契家兄長執事二十四年之別山川阻脩莫遂一會晨夕惟翹企尺素之書稍慰契闊至今未奉一字其於馳戀之懷奚啻飢渴去秋得剡西孫孟昭書知有教翰至東陽煩單宗陽付趙希德轉達舍下不意希德領書遂一疾不起後問其諸

子竟失所在惟增悵恨而已茲會貴邑祁姓商人詢知使門與其同里葉宅有姻聯之雅從而獲審文候動履廸吉賢伯仲均綏多福爲慰僕今歲假館於金華郡城義士袁仲仁家童冠嘒嘒遣日學無寸進徒於世有生無益死無聞之憂懼耳視執事賢伯仲德脩而業廣文雄而名振士林者不可同年語矣敝郡斯文寥寥潛溪文脉之遺僅有浦江鄭義門叔度先生檢討叔美先生乃弟叔端先生三數公而已聚會間談論同門往事未嘗不慨然興歎先師遜志齋及先人諸公之不作而深有羨於賢伯仲能繼斯文於茲時也遜志遺文鄭氏收輯四五冊缺逸頗多長史公每從僕抵貴郡會賢伯仲補完之貧病多故未卜何時可遂僕痛念遜志名蹟日就湮沒欲執事與令兄商確搜輯其學行幽潛生卒始末爲家傳行狀以傳同志有愛慕之心者自能默識而謹藏或可待時發揚於萬一此事惟賢伯仲從之久而知之深餘恐未能暴白其志而遜志冥冥中無望於賢伯仲乎撰次成幸附便來或躬造義門一遊甚佳遜志表姪鄭季温珣近有消息否或歸隱鄉里執事幸囑其來與僕一會或可謀往聚寶門旅殯之所負遺骸歸

瘞故里此區區之素志必欲行之而未遂也執事幸
加深察因祁歸便特此聊達遠懷餘不能悉惟萬萬
自愛以副交遊遠望

方先生小傳

郡齋舊刻

先生方氏名孝孺字希直一字希古嘗以遜志名其
齋 蜀獻王更之曰正學世稱正學先生遠祖自桐
廬徙居寧海父克勤洪武初擢知濟寧府言行政事
名一時毋林氏元至正丁酉生先生時有木星墮
其所雙瞳炯炯如電甫髫髻日讀書積寸人以其善
屬文呼爲小韓子十五六時侍父濟寧歷齊魯之墟

覽周公孔子廟宅閭陋巷舞雩所在慨然有愿學之
志洪武八年父被誣逮獄上書政府願以身代不報
明年以文謁宋公景濂深驚器之名流老輩皆讓不
敢及會父坐空印事草疏將詣 闕伸理而父沒扶
喪歸葬又明年宋公致仕還浦陽復往卒業凡四載
辭歸公尋徙蜀先生欲往省不果爲文籲天願輸已
壽以延師齡洪武十五年 上用吳沉揭樞等薦
聘至陳說多稱旨 上謂樞曰方孝孺孰與女對
曰十倍於臣 上以是不忍輕用諭遣還家數年
復辟至 上知先生志存教化謂群臣曰今非用

方孝孺時乃除漢中學教授。蜀獻王延之處以賓師。恒曰方先生古之賢者也。先生久于蜀。因得訪宋公墓。卹其孤。遺癸酉丙子校文京府。三十一年戊寅。大孫嗣召爲翰林博士。尋進侍講。禮遇甚重。當是時。天下識與不識咸仰之。以爲顏孟程朱復出。旣靖難。兵下城。破嗣君亡。文廟納姚廣孝言。召用先生。不屈死之。夷其族。時革除建文之五年。永樂元年也。年四十六。所著周易枝辭周禮考次目錄武王戒書注宋史要言基命錄文統皆燬。不傳。宣德以還。國禁漸開。遺詩文始出于世。贊曰方先生在當時名重行尊。故得禍最慘。然以身殉主。自其常分。而心之安也。自晚宋來。士習大衰。先生無所待。而興其志願。學聖人慨然以經世宰物爲心。謂三代政教鑿鑿可行。於今其本在脩身故篤志力行。箴儆之道無不備。心事皦然。無毫髮可疑。信子曾子所稱君子人也。誠得師孔子將不爲曾子矣乎。

正學先生事狀

臨海陳紀

先生名孝孺。字希直。姓方氏。裔出桐廬玄英處士。宋初徙居寧海緱城里。曾祖子野。祖炯。元鄞縣儒學教諭。父克勤。母林氏。以至正丁酉。先生生。癸卯。母沒。時

方六歲哀慕如成人洪武辛亥隨父知濟寧謁曹國李文忠公公禮貌之期爲國士乙卯父被誣下獄上書丞相府願以身爲軍贖父罪丙辰以文謁金華宋太史公于翰林公視其凝重不遷於物穎銳洞釋諸理有喧啾百鳥中見此孤鳳凰之喜館置左右譚經歷三時會父坐空印事草疏將詣闕伸理值父沒扶櫬歸葬丁巳太史公謝事還浦陽先生復執經往侍凡理學淵源之統人物絕續之紀盛衰幾微之載名物度數之變無不言之析於一絲會歸大通每粗發其端即能逆推而底于極見於論著文義森蔚辭

濯然常新未始有竭進脩之功日有異而月不同僅越四寒暑而已庚申之秋歸省祖母公惜別因叙其素有之善勛以遠大之業且曰予所許者不獨在文後二十餘年當信其爲知言辛酉公徙蜀先生往省不獲爲文籲天願以已之壽年輸委乞延師命壬戌秋在郡城會葉林張陳四君子登巾山絕頂縱談千古竟夕不寐先生自以此樂乃蘇子瞻死後三百年所無也癸亥召至京以疾還壬申復召除漢中府學教授有令許至家與妻偕往癸酉閏四月到任時京府啓儲君四川遵蜀王命俱以鄉試考文見徵

先生辭四川赴京府甲戌春朝蜀獻王道經夔得
謁宋太史公墓而卹其家王好善忘勢召對不名
賜號其讀書之室曰正學學者稱爲正學先生自是
書啓往復無虛時其賜教有曰闔門忠義爲百世光
華先生謝云惟當克己慎行益勵夙心體國忠君不
負所學丙子考文京府戊寅高皇帝賓天皇
孫嗣位召爲翰林博士己卯陞侍講命考文京府庚
辰復司會試一時君臣道合有大制作若省躬殿銘凝
命神寶頌御史府記東甌王神道碑銘皆出先生手
是時海宇謐靖幽州兵起先生憂國追惟劉中丞基
之淚下未幾天命有歸先生以死殉君至於夷滅
不變上距宋太史公惜別時適二十餘年矣知德之
深知言之至至是信哉爲文雄邁醇深所著述有僅
存者然當時有禁又五十年鄉之儒紳始蒐輯成帙
鈔梓以傳南安守華亭張弼題其卷後曰篤信好學
守死善道宇宙之間僅見此老九原有知亦足以少
慰也夫子小子景仰先哲直以甲子書其所信者以
示不忘弘治己酉五月朔

成都府正學方先生祠堂記

臨海趙淵

君子之學曷爲正持其志養其浩然之氣而已矣是

故志立則氣充氣充則人與天一無是氣天地亦幾乎息矣而况於人乎吾台方先生希直蚤以聖賢自期其言曰學聖人者須先識孟子學孟子者須先識浩然之氣又自名其齋曰遜志蓋其平生所得力處端在是矣我高皇帝時兩召語合稍除漢中教授蜀獻王復數延之尊之曰正學先生於是天下識與不識咸望之若孟子建文初累官侍講與決大機天下倚之若伊尹靖難兵至姚廣孝輩中以烈禍屹不爲動天下義之若夷齊若此者正孟子所謂不能淫不能移不能屈焉者矣非學之正志之篤有得於所

謂浩然者耶卒之國禁關於仁皇廣孝奪於今日上遺文盛流天下寶之蓋出於人心之同然而不容以終泯者如此頃淵遊蜀謂先生過化之地義宜建祠廼僭僚案白于都御史唐公鳳儀御史丘公道隆旣復聞于玉王曰隆真儒以光我先王余責也於是承奉君周宣陶宣審儀周琦者復慨然各輸數伯金以襄膺德祠成仍題之曰正學初潛溪宋先生客葬於夔獻王惠王凡兩遷之其墓其祠則宋承奉景之所自營者而今祠則其東曠壤也越蜀幽明之遇似亦非偶然者矣嗚呼師生之緒君臣之義

列聖列王之德此誠關一代大故而奚可以不書
若承奉諸君之効義夫亦人所難者因并及之且以
語蜀之多士相與游心於先生之學云
嘉靖壬辰夏四月既望

祭文貞公文祠在漢中府學 和順王雲鳳

公博究經史高談仁義動息言貌必揆諸禮法文辭
渾然天成浩浩洋洋寫其所得該括萬事慨慕三代
之治自任經濟之重立朝未久殺身成仁百千萬年
凜有生氣公嘗教授漢中未斬之澤于今猶在鳳按
部過此率諸生稱公爲文貞先生潔除一室題曰正
學祠正學者蜀王賜公號也作主祀公俟後之欲知
公者有攷焉謹告

過侯城里有感

金陵魏澤彥恩

笏輿衝雨過侯城撫景依然感慨臨黃鳥向人空百
轉青猿墮淚只三聲山中自可全高節天下難居是
盛名却憶令威千載後重歸華表不勝情

謁侯城里有感

太平謝省

侯城里侯城老人死不死萬丈文光射列星正流一
派分洙泗忠肝義膽照冰雪烈氣憑憑塞天地神遊
帝側騎箕尾行天還整羲和馭寒爲陽和旱爲雨精

靈颯爽誰能閱冥交不用覓逢于脩撰王郎舊知己

又

謝鐸

我憶侯城人不見侯城里悲風忽何來令人淚如雨
侯城西薄山侯城東逼海西山不可餓東海不可死
千秋萬歲心悽惻竟誰語惟應劔光血夜夜衝斗起

又

謝鐸

欲向西風酹一樽乾坤何處著英魂百年事過風前
燭千古名傳海上村香火半龕誰地主孫枝一葉是
君恩夕陽滿地傷心淚付與江流自吐吞

謁正學先生祠堂

吉安袁道

我從東南行清風東南至往事垂百年行人口如矢
大商有夷齊大唐有王魏稽首拜先生地下知誰愧

附家傳

故愚庵先生方公墓版文

宋濂

嗚呼自我齊國文公紹伊洛之正緒號爲世適益衍
而彰傳道受業者幾徧大江之南而天台爲極盛時
則有潘子善氏林叔恭氏趙幾道氏兄弟以及杜仲
良氏如此者不能徧舉皆見而知之推原體用之學
敷化弘治而風動於四方重徽疊照於斯爲至流風
遺俗迄今猶有未泯若我愚庵先生方公其殆聞而

知之者歟先生諱克勤字去矜姓方氏其裔出睦州
玄英處士干宋初十五世祖廿四府君某始遷寧海
侯城里曾大父重桂鄉貢進士大父子野父炯元郵
縣儒學教諭母葉氏宋丞相彥鼎從曾孫女也先生
幼而端凝五歲知讀書自辨章句十歲暗記五經諸
老先生嘖嘖愛賞目爲神童年垂弱冠徧窮瀛洛關
閩遺書及尋鄉先達授源委凡涉性命道德之秘窮
研探索寢食爲之幾廢因喟然歎曰爲學必合天人
而後可舍是非學也至正甲辰嘗一踐場屋言國家
利害峭直無所顧忌有司不敢取飄然東歸益閉戶
潛心于一卦一爻必欲驗諸事爲至於天文地理禮
樂刑政及制度名物之屬亦辨析歸於至當如指諸
掌會海民爲變江浙行中書檄吳江同知金剛奴募
民爲水兵先生詣金剛奴謂曰民計窮而爲盜未爲
盜者亦挺挺欲動柰何授之以兵是謂增盜非禦盜
也金剛奴怒不答旣而水兵果於中道殺護吏逃去
從盜金剛奴踰垣走折一足始悔曰吾不從方先生
言以至於此未幾侍御史左谷納失里至郡招諭劉
都事某爲之副先生上書陳勦殄之畧不宜姑息都
事聽其言而不能行遂致郡縣陷沒民罹塗炭先生

發憤入山谷採松栢食之累日不返當路延先生入
幕府先生謝曰我辟穀久矣弗足與人間事也吳元
年冬 大明兵取台州先生欣逢

真主之出乃大有爲之時 疏舉賢才安人心黜家
強除暴歛明教育十餘事將上之未果洪武二年詔
立郡縣學以訓導辟先生樂於育才即起應命負笈
來從者至百餘人先生據經陳義曲暢旁通幾無毫
髮遺憾聞者皆淪肌浹髓薰爲善良俄以母夫人
春秋高力辭而歸諸生追之者踵相接學舍爲空四
年夏

朝廷聞先生賢欲致之部使者袁君宏以書幣來徵
先生以母老不忍離左右辟去旁縣郡承使者風旨
雜逮媼連督索之先生上 京師兩詣執政固辭執

政竒先生材命就銓曹試考覈入格名列第二

上特命知濟寧府事階朝列大夫錫之冠帶以行先
生至官爲書一通懸於康衢諭 上愛養元元之

意民有所不平詣府自言禁吏胥不得呵問日引耆
耆坐語訊以得失郡學官缺孔子廟堂頽圯聘前進
士爲師弟子負有未備者選補之役浮屠以葺廟堂
廟南鑿爲泮池傍列兩序闢射圃於廟北造弓矢樹

正鵠日一再視學親爲正句讀較中否屬縣之內社
各立學學凡數百區學子繫籍者二千人兵後號爲
最盛始有詔民闢廢田者閱三載乃稅吏徼近功不
俟期歛之復以田定起科繇民益隋田不增闢先生
與民約定爲簡書列爲丁產爲上中下三等等復柝
爲三每有徵發恒視書爲則吏不敢並緣爲姦歲且
暮轉戎衣于燕時有令役民舟者有誅別郡以牛車
從事天雨雪牛僵死于道破產者十八九民請以舟
就役僚佐畏令難之先生曰吾知從民便抵法非所
辭也即載以舟具白山東行中書省省義不問郡倉
絕糧省檄民七百里轉粟青州民病不能適漕運者
自淮安輸濟南道出郡境先生欲就輸郡倉而俾濟
南致青州告于行省弗聽即以聞戶部戶部奏可行
省且愧之郡城壞故事築以兵指揮使挾貴人勢當
五六月聚民萬餘治之民不得田哀號而即工聲聞
數里先生奮曰民病不收惡用二千石爲密聞中書
同官疑且得罪不敢署名先生獨署之胡丞相惟庸
以聞即日詔罷先是不雨先生袒跣徧禱群祠
涕泣卧祠下誓不雨不還至是詔下民驩呼而
散大雨如注是歲五穀俱熟民歌曰孰罷我役使君

之力孰成我忝使君之雨使君勿去我民父母自是連三歲三禱皆有年五年秋隣境盡蝗先生省愆變食稽首告天夜聞空中薨薨聲燭之乃飛蝗蔽天而過郡獨有年民有赴愬者隨事則決大者答辱小者諭遣之不畱案牘尤慎於庶獄月錄日省不使久淹或文有未具時作糜徧食之夏秋之稅每命斛卒持槩高下出其手或至累旬不收民競指倉爲穽先生令民自槩斛卒斂手不敢出氣遇將西成預移文與民期民爭來輸不遣一吏而稅常先登江西浙西二行省運糧百萬濟寧水陸數千里先生視如部民不使有錙銖怨懟舊比每斛益四升以裨蠹耗先生憫其道遠言于朝蠲之府召州縣官屬皆役阜隸往往索賂無厭先生下信符置郵無敢不至者信符之籍以印識而申分之吏托月日稽違以媒利先生私歲之緩急有程一自已出復行其法於封內壹以信符召民民得竟并力耕桑襁負來歸者相望于道初赴官時戶僅三萬稅萬餘石三年之後稅以石計者十四萬四千七百戶亦增至六萬有奇二州二十縣家有積粟野無餓莩羊牛鷄犬散被郊坰富庶充實如承平之世至於社稷山川諸祀先生脩崇壇壝嚴飭

器服或樹名木於周垣之外一如儀制無有所闕水驛在西門內庫陋污濕居者弗寧先生料揀材木候農之隙更作於城南庭堂室房弘敞逾昔冬寒河凍驛舟不行令舟人伐木爲炭穿土穴藏冰因其餘力以成事功泗水經郡城南通淮江北引河濟地勢高瀉構石爲牖而時畜洩之魯橋棗林二牖歷歲久壞石填河中舟道難之役牖丁緬壞石治灰而甃之故以蓄困辱糧火屢爲災教民爲陶瓦營屋百餘間申戒火令編民居爲曹伍遞相救恤其患遂止大將軍魏國徐公達副將軍曹國李公文忠統士馬十萬之燕駐郡稍久要官勢吏爭索糧芻相膠葛于前先生依序酬決無不如意一軍稱能求嘉侯朱公亮祖將舟師數百艘北征河水涸舟膠不可動脅先生曰即趣五千夫浚河否則以軍法論日且暮先生不忍煩民泣禱於天夜二鼓天雨黎明水起數尺舟竟去莫有言者先生爲政以風化爲急務以德勝佐貳始雖倨慢先生委誠待之卒自愧服武夫悍將不知禮久亦化戢在官縱無事終日冠衣坐堂上召諸吏授以書詩法律或公牘堆几群辨方譁先生片言折之各心悅而去性不喜近夕常自誦曰近名必立威立

威必至害人吾不忍爲也府庭之間不陳杻械革鞭
懸楹間示不妄罰省憲考績爲六府最八年春入朝
皇上以爲善治民錫燕儀曹使踐其舊職瀕行
獎諭有加且曰政成當顯用卿秋八月知曹縣事程
貢嘗以不職被笞心銜之上封事言狀詔御史楊
某廉按楊適程故人恐程坐誣罪易民服潛索先生
過事踰兩月無所得乃捕府中卒吏盡繫之榜掠無
完膚無一可問者楊更與其吏謀誣先生用倉中灰
葦時十月固未嘗附火而葦則苦公宇垣實無私用
者先生不與辨遂就逮民號呼填道隨行百餘里者
將千數先生次子孝孺上書政府大臣願以身爲軍
贖父罪不報竟謫役江浦會空印事起吏又誣及之
孝孺復草疏將伏闕上訴而先生歿於京師九年冬
十月二十四日也壽僅五十又一孝孺與兄孝聞奉
柩東歸十年春二月二十四日窆於縣東北深灣童
施山之原禮也先生娶林氏諱姬婦道爲一族冠先
十五年卒至是合塋生子二人即孝聞孝孺孝聞年
十二居母之喪不肉食至服除人以純孝稱之女一
人再娶王氏諱在生女一人未彌月而王卒少房董
氏育之董氏生子一人曰孝友二女皆在室未行先

生面白如玉須眉秀整不妄咲語動容周旋必合禮法兵亂負母逃入深谷兩踵血流遇二弟訓育備至終身未嘗失色與人交率真任質不事表襮不以久近爲冷熱立談之頃洞見肝膈南冠過郡者必以米醪饋之不能步者僦舟車送之萊蕪丞陳川欲迎母爲養厄於無貲出錢五千助之同列以事奪祿買布帛給其用且日延之對食久而不衰脫逢其飲醉投案太詬而去待之益恭及酒解來謝陽若不知者曰昔之夜吾亦醉矣不識君何謝也生平奉養簡素不服絢綺御一布袍數載不易日不再肉不治官事輒却肉不食所守廉甚絲毛不取諸人每行縣以物自隨杯湯不肯受兗州守因童進二水瓜笞童十名州吏還之鄉人有爲饒陽令者以燭雁侑書力却去乃已初至官時祿米一斛可易金三兩以軍食告乏月取十斗爲食餘悉儲于倉或充其迂不恤也晚年益加畏慎書所爲之事夜則白於天俯仰皆無愧作榮辱利害恒視之若一坦然不疑古所謂體道成德之人先生誠庶幾焉其爲文章質而不華平而中理有汗漫集若干卷傳學者云濂私自念齊國文公之薨始一百七十又九年而其學寔微譁世取寵者徒

剽掠爲談辨誇多闕靡者務組織爲篇章文公所以
扶世教淑人心者率棄爲空言故其臨事之際仰攬
俯拾唯恐利不入橐至有庸夫賤豎之不屑爲者嗚
呼可嘆也已有如先生聞風而興乃能誠求實踐參
前倚衡儼若上帝鑒臨涵養旣純發舒自異仁民善
俗之政至今人人能道之大命雖止於斯而其率性
會道無愧於文公者尚皦然弗誣也孝孺久從濂受
經頗知先生行事之詳於是歷叙其故而繫之以銘
銘曰

堂堂齊公命世之雄伊洛正傳實爲大宗入天出人
完傳翼經有過必疏無幽不明疇不鼓篋千里來過
燦如聚星惟台獨多流光所及寧有翳昏揭彼日月
輝于天門逝者沄沄滅景銷聲不有人豪聞風孰興
猗歟先生行知尊聞養氣弗餒充乾塞坤實孚名隨
上徹九天鶴書翩翩降於丘園爰自布常專城以居
象笏朱衣於赫其儀寵恩之加其廣無垠曷以報之
誓不顧身敷宣帝仁達于齊氓以煦以嫗以致其亨
民或勞只如魴之頽乃平更繇俾遂其生黠胥舞文
其貪若狼乃障乃防而扼其吭人相告言久嬰亂離
父母孔邇我胡弗歸十百爲群其來如雲操厥耰鋤

以播以耘我行其原萬桑沃然俯瞰于隰黍苗芊眠
鄰多孽蝗刺天而飛避不入境絕類有知真儒之效
小試則殷誰曰漢吏專美其循太龢薰蒸郁紛輪囷
自此而升何澤弗臻大命止斯傷如之何視天方高
淚如懸河我又奚嘆數竒則然中心無慚生順死安
善人殄瘁斯道之衰顧瞻無依胡寧不哀崔崔者岡
渺渺者陂其中有墳千載之悲

方希學傳

方孝聞字希學先生伯兄也少有至性年十三喪母
輒稽典禮蔬食水飲彌越三年及父卒斷酒肉居宿
戶外祖母亡亦如之每一號慟聲盡氣極嘔噦出血
扶而後起於是寢成羸疾行步偃僂然守禮益確親
戚鄉間莫不稱爲孝子家素貧窶一錢寸帛不私妻
子奉尊撫幼衣食賓祭喪葬婚嫁費用百出經理補
葺以身任之曲中儀節儉而不陋平居未嘗去書徧
學五經而邃於易精求聖賢旨趣由致知而誠身由
親睦而愛物務萬踐履不爲空言發爲文辭理深意
遠存心仁厚接物和恕里中有爭訟者不至郡縣而
相率以質是非開以一言莫不悅服德器完精才具
優長通達世務議論甚備先生嘗曰某所以粗知斯

道者非特父師之教抑亦吾兄之訓飭也卒于家見修
史私錄及赤城新志石龍集

方希詩

方孝友字希先生季弟也舊傳 文廟召先生草
詔不屈親屬皆就戮先生目之不覺淚下孝友乃口
吟一絕阿兄何必淚潛潛取義成仁在此間華表柱
頭千載後旅魂依舊到家山士論壯之以爲不愧先
生之弟云

方氏二烈女傳

臨海章獄

正學方先生一門四節之盛世所共知而二女子之
死則或未知先年天台老儒西軒王宗元九十歲時
與石梁王君度言嘗授經烏傷山中有祝監生者老
矣謂及見西楊閣老嘆方先生二女當先生死時年
俱未笄被逮過淮相與投橋水死其事甚烈當時西
楊欲爲傳未就西軒以屬王君曰子可遂成西楊之
意後石梁由南部出守建昌亦未及爲當時獄與石
梁之子胤東實與聞之茲因重刻先生之文錄此附
載集中以見先生篤學守道不貳厥心而死君難精
誠薰浸家庭閨闈間雖二小女子臨變赴義視死如
歸不憚不回與先生伯仲之死同烈者講之素定也

或者人得併觀於此益徵先生立言無虛語真足以昭方來起後學不惟見道化攸孚且使人知反身激厲處常變茲心則同當不忍以丈夫子愧于方氏之二小女子云嘉靖庚申仲冬

新刊正學方先生文集序

臨海趙洪

洪自髫年聞諸老成稱先生之道德文章出乎天性始生之夕有木星墮於其所雙瞳炯炯如電弱冠日讀書積寸從金華太史公游時所收皆天下士先生五經百家皆已醞藉下筆翩翩盡聖賢膏腴公深驚器之以爲莫之與京厥考守濟陽坐累先生數請以

身代獲原洎應詔擢蜀府教授引道匡主獨秀於玉葉中尋用交薦內閣一時倚重凡將相間所爲惟先生之咨四方夷裔得一字珪於至璧晚路崎危皎皎大節出人所難先生易之今猶薰灼耳目也噫先生之淑履如此且天有以培祐之而漸蕩慘於無遺如此豈理也耶自古有然又何云異先生之文撰述最多大足以包天地近不離日用之常皆雋永乎道德之語而意獨至而其論辨之高遠超昔賢之見今其縹囊儲物不可得而覩矣幸而掇乎噓燼之餘所謂存什一於千百者也中間在蜀之作皆友人侯君邦

彥得姑蘇編脩陳公之所傳錄與夫博采士夫間之
記誦凡詩文二百六十七篇吾鄉之士肆畏道厥事
什襲珍藏無由哀采洪竊惟春陽已舒江漢旣濯應
不屑於毛疵矣廼於寒暑之暇捐俸募工繡梓以圖
壽傳悉手所繕落於天順六年六月望日考於次年
四月望後一日也尚恨孤陋寓僻乏好事同志與之
共成而諦訂焉魯魚中存凡經目者其加宥正又當
知先生之文不宜以文視文而以之求道得先生之
心可也雖然先生之功德固不資文章以顯先生之
文章亦不假洪以傳然洪之所以疲於僭鑿而不少
爲輕重者特爲吾鄉餼羊之計云爾苟居隱墅而如
是存德義以善里閭歷仕階而如是持忠節以奠朝
社庶乎不忝所生而可以闡聖藩矣或者典刑具存
豈非鄉人之美觀也哉豈非先生之敷錫也哉又惡
知非先生之所望於後人之志哉凡我知愛苟私所
遺惠然輻湊洪當倩巨筆以書成美敢蝕厥雅邪時
天順七年歲次癸未夏四月望日

新刊遜志齋集後序

謝鐸

右遜志先生文集三十卷拾遺十卷爲文千二百首
總若干萬言於乎先生之文不見於世也久矣天順

中趙教諭洪實始鋟梓以傳既而鐸與文選黃君孔昭頗加蒐輯於是葉文莊公盛秋卿林公鶚王忠文公之孫汶諸所傳錄者皆粹焉既又從柳別駕演盡得常人之所藏者視昔蓋不啻倍蓰而先生之文乃始稍稍以完今年春寧海令郭君紳聞之以書來曰先生邑人也是不可廢願益得以傳諸梓鐸與文選君亟喜而授之或者曰先生之功業雖不盡見於當時其道德在天下豈有不可掩者文直其餘事耳而又何以其傳不傳為先生意哉鐸曰不然文者道德之著而功業則又文之見於行事者也伊周孔孟之

道德功業盛矣千載之下匪由斯文之存曷從而知之又曷從而傳之乎且至大如天地至明如日月其疾徐之度盈虛之數猶必有待乎人而况於人乎故欲傳先生之文者非徒為先生計也為後之人慕先生之道德欲盡求其功業而不可得者計也先生之文非吾台所敢私亦非予小子所得而贊特以著令尹之志於不忘且以告夫天下後世知誦先生之文者令尹又嘗即先生故居求所謂祠堂者而新之蓋洪熙初先生之遺族得從寬法而為之者也常本舊稱遜志齋集者訛缺為甚謹具存之不敢別有所更

益教諭之編有的知其非出於先生者乃不敢取其
曰正學者蓋蜀獻王所賜遜志則先生所自號今并
入之以復其舊而其續得者當更爲別錄云成化己
亥冬十月朔

新刊遜志齋集後序

黃巖黃孔昭

孔昭自幼習聞先生之名於鄉長老私謂先生學本
天成非人所能及也既長稍知向慕求先生遺文而
讀之則知先生之學雖浩瀚如江海運動如日月變
化如鬼神而其所言無一不出乎日用彝倫之常蓋
皆愚夫愚婦之所能知能行而天地聖人之所不能

外嗚呼先生之學固孔子孟子之學也學者欲學孔
孟之道孰得而後之哉惜其遺文散佚天下僅見趙
教諭刻本孔昭乃與謝侍講鐸日加訪采而其邑之
秀彥猶能各以所藏來告遂合葉林二亞鄉王李二
中書與柳常州之所得者彙次之而是編成焉於是
先生之文亦庶幾其全矣然先生之學已不愧存歿
文之全不全亦奚損益哉惟吾後人小子欲求先生
之道者非此則無以考其全也集既成福建林僉憲
克賢寧海郭縣尹紳各以書來請壽諸梓孔昭與侍
講圖斯文永久莫如先生桑梓之地故奉以屬郭尹

郭尹又蒐訪於其邑得詩與文若干首附益之方經畫名工而金義士明陳訓導熙鄭學究公詢秀才楊顓金遠輩咸奮義助相校書董治各有司任不日月板將告成嗚呼於此又可見先生德澤之在鄉邑者愈久而愈不忘也雖然是集也抑豈吾台人所得而私之哉庸書諸末簡以告天下後世之欲知先生者成化十六年庚子夏五月朔日

書方正學遜志齋集後

張弼

二十年前瑞安楊元霽知吾華亭嘗出方先生遜志齋藁見示乃錄本也且道先生大節頗詳謹讀而妄

書其後曰篤信好學守死善道宇宙之間僅見此老後得刻本則又加多竊謂孔子此八字而豈過也乎猶以見之未盡爲恨今年二兒弘宜知寧海乃先生之闕里也得全集十二本寄南安秉燭疾讀掩卷深思如讀程朱之集喜而忘寐而又不覺涕泗之交零也嗚呼學之正養之克行之確而此八字未爲過也三代而下可考其詳者大節或有之所養所學恐未逮乎當時有以歐蘇擬之者宜其弗屑也我朝以宋潛溪楊東里爲文章稱首然恐亦不當出其右乎於乎以文章家目之殆非先生之知己也於乎九原

可作舉世皆當奔走爲之執鞭如遇孔子不知以三
仁許之乎嗚呼成化十八年壬寅五月之吉

書重刻遜志齋集後

先生王者之佐于時以彼其才易服就列宜致卿相
之位究厥謨猷願豈與唐王魏者等先生不此之願
悲焚抗激至磔身沈族而氣不少回凡以存君臣之
義爲天下防也嗚呼忠哉抑有功於昭代深矣雖
報卹闕然而遺文盛流斯固列聖之惠與文始
集于趙學諭洪至禮部尚書謝公鐸工部侍郎黃公
孔昭益廣搜之得若干卷刻諸寧海木今悞矣乃會

黃叅軍縮應吉士良趙大行淵刪定僞謬重刻斯編
以行于世俾知夫奮大忠者本如此云正德庚辰仲
冬朔守台後學姑蘇顧璘識

臨海縣知縣黃誥

黃巖縣知縣張師善

台州府儒學教授尚芳

訓導李深

黃巖縣儒學教諭文程

府學生陳縝 葉琰 王梅齡
臨海縣學生李臨 戴濟

葛嚴縣學生孫思光 牟汝鈞 校對

遜志齋集卷附錄 終



